

Eliywi Okukumanena ni JOWANI Okulimukisa

Eliywi okukumanena ni Jowani niinjili no tibuka tinee tili mu Tesitamente no ubya eti titalusa omooyo wa Jesu Kilesite. Einjili niinjili kame iisaniwa nji, “Eliywi” Okutalusa nji, “Eliywi no kuwaba.” Kame tina kuñoliwa munyima no lifu lya Jesu kwa Mateu, Maleka Luka ni Jowani. Eliywi okukumanena kwa Jowani kame lina kuñoliwa luli kwa Mutumiwa Jowani mu myaka no kukwana makumi atanu naanee munyima no kuleiwa kwa Kilesite. Simba nji ebuka kayaamba nji Jowani yona kwiñola. Omukwa no muñolelo kame okufekile luli ni mañolo a Jowani no weli neli no wiili mane neli no waatu. Añoli anjili kame ana beeke Jowani oyoya mu muleneñi no Efese ba nako ino cwale kame kumonahala nji ebuka kame ina kuñolelwa mu Efese.

Jowani na kumonisa aba no kukena nji etuso no buka ni kutusa aanu okupumena nji Jesu ya Kilesite, Omwana Nyambe no kuyoya (20.31). Mukupumena eyi mwendi mbatwikala ni mooyo mu litina lyaye. Ebuka kame ina kuñolelwa aanu onje Amajuda nawo kasa Majuda. Eliywi okukumanena ni Jowani kalikufekile ni maywi anjili aatu. Yonyene kame atwala onene omuhupulo waye ku timakazo eto ana kutenda Jesu mi kasi kuñola onene ku tinguli ta Jesu. Einu injili no utokwa kanyi ekolobezo ya Jesu mane omuliko na

mu lihalaupa yonyene kaya sikuñoliwa mu liywi lyaye.

EMITWI NO TITABA

Jowani kame atateka eliywi mu kauhanyo (1.1-18).

Cwale kame añola eino kupula no timakazo eto ana kutenda Jesu (1.19-12.50).

Esisitatamako kame atoloka etinako no kupula mu mooyo wa Jesu owo utwala mane konji ku lifu lyaye ni kukwinguka kwaye (13.1-20.31).

Jowani kame amana eliywi mu kauhanyo eyi no 21 okwamba einjili no tinako eyo ana kumonahala Jesu kwaanu munyima no kwinguka kwaafu, mi cwale niku monisa elibaka lyaye elyo ana kuñolela ebuka.

Eliywi sebeli litenda Omunu

¹ Ku simuluhu kame kuna kwikala Eliywi, mi Eliywi kame lina kwikala ni Nyambe, mi Eliywi neeli Nyambe.

² Kame ana kwikala ku simuluhu ni Nyambe.

³ Einu yonje kame ina tendiwa mwa yonyene, mi kweyi ina tendiwa kakwisa esinu no kwaa tendiwa yonyene.

⁴ Mwa yonyene kame kuna kwikala omooyo, mi omooyo neli eliseli no aanu onje.

⁵ Eliseli kame libenya mu uwi, mi ouwi kawasikoma eliseli.

⁶ Kame kuna kwikala omunu ona ku tumiwa okutunda kwa Nyambe, mi elitina lyaye neli Jowani.

⁷ Kame ana kwiyela oupaki, mukupaka eyi no liseli, nji mwa yonyene aanu onje apumene.

⁸ Kasa nji yokame eliseli kono kame ana kwiiya mu kupaka eino liseli.

⁹ Neli eliseli no niti elyo limonyekela omunu yonje woyo oiya mu litunga.

¹⁰ Na kwikala mu litunga, mi elitunga kame lina tendiwa mwa yonyene, mi elitunga kalisi ku mulimuka kale.

¹¹ Kame ana kwiiya ku naha yaye, mi aanu aye kasi kumu tambula.

¹² Kono kwa onyene onje ana kumu tambula, awo ana kupumena mu litina lyaye, kame anaabi amaata no kutenda aana a Nyambe.

¹³ Awo na kwa leiwa ku unyinga, simba etakazo no unu, simba oku singa kwa munu, kono oku singa kwa Nyambe.

¹⁴ Cwale Eliywi sebeli litendiwa omunu ni kuyaka mwaaci, yo iyalile esishemo ni niti, mi kame tuna kubuha ekanya yaye, eili ekanya eyi ilukela Omwana no libanda woyo otunda kwa Sitange.

¹⁵ Jowani kame ana ku paka eyaye niku kuweleza nji, “Yokame woyo nina kwamba nji, ‘Woyo oniiya munyima kame anibita, kakuli kame ana kwikalako oweli kwa mene.’ ”

¹⁶ Cwale mu kwiyala kwaye kame tuna wana tonje, esishemo esi siekeza ba sishemo.

¹⁷ Kakuli omulawo na ukwiiya mu libaka lya Mushe, esishemo ni niti kame ineeyi mu libaka lya Jesu Kilesite.

¹⁸ Kakwisa omunu onaku monabo Nyambe. Konji Omwana feela, woyo oli ba saali sa Sitaye, yo kame woyo ona mutende nji alimukiwe.

Elinusa lya Jowani Omukolobezi

19 Cwale uno oupaki wa Jowani, aendisi no Majuda aba ana kutuma apulisita ni Malebi okutunda ku Jelusalema okwiiya muku mwibanguta nji, “Tiwe anyine?”

20 Jowani sebeli opumena, kasikukana, kono sebeli wamba nji, “Kasa mene Kilesite.”

21 Cwale sebeli amwibanguta nji, “Iikene cwale?” “Tiwe Eliya?” Jowani sebeli wamba nji,

“Kokuulwa kasa mene,”

“Tiwe omunuhi wa Nyambe?”

Mi sebeli otambula nji, “Kokuulwa.”

22 Cwale sebeli aamba kwa yonyene nji, “Tiwe anyine, nji tu limuke omo sa tu tambwele awo anatu tumu. Ikene cwale wamba mulibaka lyowe?”

23 Jowani sebeli otambula nji,
“Time eliywi eli likuweleza mu lihalaupa, eli lyamba nji,

Mu lukise endila ya MBUMU, kanyi omo anambebe omunuhi wa Nyambe Isaya.”

24 Cwale awo ana kutumiwa kame ana kutunda kwa Afalisi,

25 cwale sebeli aibanguta Jowani nji, “Cwale iikene aba okolobeza nji kasa wene Kilesite, simba Eliya, simba omunuhi wa Nyambe?”

26 Jowani sebeli waatambula nji, “Mene kame ni kolobeza ni meyi, kono omo mwaanyi kame kwimanine omunu mwaayii.

27 Simba yonyene woyo oiiya munyima yange, ka nitwese oku nungutula etikwele no etinjangwa taye.”

²⁸ Eyo yonje kame ina ku tendahala mu Betani mu linjaliya lya Jodani, omo ana kwikala Jowani yo kolobeza.

Jesu Omukoko wa Nyambe

²⁹ Eliywaa lina ku tatamako Jowani sebeli omona Jesu yoiya kwa yonyene, mi sebeli wamba nj, “Komumone, uno omukoko wa Nyambe woyo utundisa esibi no litunga!

³⁰ Woyo yokame nina kwamba nj, ‘Woyo oni-
iya munyima kame anibita, kakuli kame ana kwikalako oweli kwa mene.’

³¹ Ni mene kanisi kumu limuka, kono aba ni neeyi mu ku kolobeza ni meyi, neeli nj amona-
hale kwa Isilaele.”

³² Mi Jowani sebeli omupaka nj, “Kame nina mono Emebo ina tundu ku wilu ikufekile kanyi elikwici mane sebeli liikala ba yonyene.

³³ Mene kani sikumu limuka, kono woyo onani tumu muku kolobeza ni meyi kame ana nam-
bele nj, ‘Woyo so mone Emebo ishetumuka kwa yonyene niku mwikala beulu, yokame woyo so kolobeza ni Mebo No Kukena.’

³⁴ Cwale kame nina mono, mi kameni paka nj yokame Omwana a Nyambe.”

Aiyetwa a Jesu no Weli

³⁵ Eliywaa lina kutatamako kame Jowani sebeli oimana na iyetwa aye ayiili,

³⁶ mi aba anaku mona Jesu yoenda sebeli wamba nj, “Komumone omukoko wa Nyambe!”

³⁷ Aiyetwa ayiili sebeli amuyupa yoamba eyi mane sebeli akoña Jesu.

³⁸ Jesu aba ano kutemuna, cwale sebeli waa-mona amukoña, mi sebeli wamba kwa onyene nji, “Ikenene mu saela?”

Cwale sebeli aamba kwa yonyene nji, “Labbi” (okutalusa nji Mwiyeti,) “Kubine wikala?”

³⁹ Jesu sebeli waatambula nji, “Mwiiye mumone.” Sebeli aiya niku mona oko ana kwikalanga, mi sebeli aikala naye eliywaa elyo, kakuli neli enako no likumi ni tutanu ni kamweya (4 okuloko) no mangolwaa.

⁴⁰ Adiliyasi minaye Simoni Pitolosi, neli omunjili kwa iyetwa ayiili woyo ona kuyupa Jowani yo amba, mi sebeli amukoña.

⁴¹ Kame ana kutateka oweli okuwana Simoni omukulwaye ni kwamba kwa yonyene nji, “Kame tuna wana Mesiya” (okutalusa nji “Kilesite”).

⁴² Adiliyasi sebeli olita mukulwaye kwa Jesu.

Jesu sebeli omwaliketa ni kwamba nji, “Tiwe Simoni omwana a Jowani, kame soisanwe nji Kefasi.” (Okutalusa nji, “Pitolosi.”)

Jesu yo Isana Filipi ni Natanaele

⁴³ Eliywaa lina kutatamako Jesu sebeli osinganyeka okuta ku Galileya. Cwale sebeli owana Filipi ni kwamba kwa yonyene nji, “Onikoñe!”

⁴⁴ Cwale Filipi kame ana ku tunda ku Betisaida, omuleneñi wa Adiliyasi ni Pitolosi.

⁴⁵ Filipi sebeli owana Natanaele ni kwamba kwa yonyene nji, “Natumu wana woyo ona ñoliwa eyaye kwa Mushe mu mulawo mane ngeseo ana kuñola anuhi. Jesu no Nazaleta, omwana a Josefa.”

⁴⁶ Natanaele sebeli omwibanguta nji, “Kwa sili esinjili no kuwaba esisa si tunde ku Nazaleta?”

Filipi sebeli wamba nji, “Wiiye, omone.”

⁴⁷ Jesu sebeli omona Natanaele yoiya kwa yonyene, sebeli wamba eyaye nji, “Komumone omwisilaele no niti, mi mwa yonyene kakwisa esi sinyazahala!”

⁴⁸ Natanaele sebeli wamba kwa Jesu nji, “Ngasi-bine omo onani limukele?”

Jesu sebeli omutambula nji, “Filipi yokasi kwisana kale, me oikalile munji no sitondo no mukuyu kame nina kumono.”

⁴⁹ Natanaele sebeli omutambula nji, “Labbi, tiwe Mwana Nyambe! Ombumu no Isilaele!”

⁵⁰ Jesu sebeli otambula Natanaele nji, “Kakuli kame nina kwambele nji kame nina kumono oikalile munji no sitondo no mukuyu, bokame aba opumena? Mbumono einu no kuneneba okubita eyi!”

⁵¹ Jesu sebeli omwambela nji, “Niti luli kame nikwambela nji mbumono eliwilu eliyatulukile, mi amangeloi a Nyambe akambama mane niku shetumukela beulu ya Mwana no Munu.”

2

Omukiti no Likwala mu Kana

¹ Ba liywaa no waatu, sebeli ku tendiwa omukiti no likwala mu Kana na mu Galileya. Mi inawaye Jesu kwana kwikala,

² Jesu ni yonyene sebeli oisaniwako ku likwala na iyetwa aye.

³ Cwale ewaine aba ina kubwa, inawaye Jesu sebeli wamba kwa yonyene nji, “Ewaine naibu.”

⁴ Cwale Jesu sebeli otambula inawaye nji, “Inawange, etaba yange ni wene ibine? Enako yange kai sikeela kale.”

⁵ Inawaye Jesu sebeli wambela abika nji, “Mutende eso asa myambele sonje.”

⁶ Cwale kame kuna kwikala otucoo no mawee tuna kukwana tutanu ni kamweya (6) tu suminwe abo, otu tuyoweelwa mu mukwa no Majuda, akanjili ni kanjili kame kana ku shimba owima ukuma ba mwanda.

⁷ Jesu sebeli waambela nji, “Mwitelemo ameyi twiiyale.” Mi sebeli atwiyata mane niku yubooka.

⁸ Jesu sebeli waambela nji, “Cwale mu tekulemo mi mu twalele osi kutaba eilya no mukiti.” Mi sebeli amu twalela.

⁹ Cwale omutabi no ilya no mukiti aba ana kwetekako ku meyi ana ku futulwa ewaine, kakuli kasi kulimuka omo ina ku tunda, (kame kuna ku limukiwa feela abika ana ku tekula ameyi), omwendisi no mukiti sebeli oisana omukwati

¹⁰ ni kwamba kwa yonyene nji, “Omunu yonje kame abaanga ewaine no ku mamata oweli, mi cwale aanu aba mana okukoliwa onene, cwale okubinda aabe eyi no kwamuba, kono wene kame ona teula eyi no kuwaba konji abano!”

¹¹ Yo kame emakazo no weli eyi ana kutenda Jesu mu Kana no Galileya, mi sebeli omonisa ekanya yaye, na iyetwa aye sebeli apumena mwa yonyene.

¹² Aba kuna kubwa eyo, Jesu sebeli oshetumuka ku Kapenauma, ni Inawaye na inaaye, na iyetwa aye, mi omo sebeli aikalamo amaywaa no kucaniba feela.

Jesu Yoota ku Ndoo ya Nyambe
(Mateu21.12,13; Maleka11.15-17; Luka19.45-46)

¹³ Epaseka no Majuda aba ina kukeela abeebi, cwale Jesu sebeli okambamena ku Jelusalema.

¹⁴ Ba patelo no Ndoo ya Nyambe sebeli oka wanabo asi ku ulisa etingombe ni mikoko ni tunkwilimba, naasi kucinca amali aikalile ba myuulo yoo.

¹⁵ Cwale Jesu sebeli okutendela olunupa no mihala icana, mi onje sebeli waacitela ku ndee no patelo no Ndoo ya Nyambe, bamweya ni mikoko ni tingombe, ni kwitela banji amali no asikucinca mane ni ku kwisa etitafule too.

¹⁶ Cwale sebeli wambela asi kuulisa otunkwilimba nji, “Mu tundise einu eyi yonje! Kamufanene okutenda endoo ya Sitange okwifutula endoo no kuuliseta!”

¹⁷ Aiyetwa aye sebeli apuluka cwale esi sina kuñoliwa nji, “Kame ni liwa mu kutukufalelwa endoo ya sitange.”

¹⁸ Cwale aendisi no Majuda sebeli aibanguta Jesu nji, “Ibine emakazo otu monisa nji kame oli ni maata no kutenda eyi no ngeesi?”

¹⁹ Jesu sebeli waatambula nji, “Mu yakulule Endoo eyi, mi mene mba ni ingula mu maywaa aatu.”

²⁰ Aendisi no Majuda sebeli aamba kwa yonyene nji, “Kame ina kwana emyaka makumi anee ni mutanu ni kamweya (46) ba kuyaka Endoo ya Nyambe eyi, cwale wene mbwiiyaka mu maywaa aatu?”

²¹ Kono kame ana kwamba Endoo ya Nyambe no lutu lwaye.

²² Abo cwalehe aba ana kumana okwiingulwa kwaafu, aiyetwa aye sebeli apuluka nji kame ana kwaambela eyo, mi sebeli apumena eliñolo ni liywi elyo ana kwamba Jesu.

Jesu kame Alimukile omo Aikalele Aanu

²³ Cwale yooli mu Jelusalema ku mukiti no Paseka, aanu no kupula sebeli apumena mu litina lyaye aba ana kumona etimakazo ana kutenda.

²⁴ Kono Jesu kaasi kwasepa,

²⁵ kakuli kame ana kulimuka aanu onje, mi kasi kusinga oupaki no munu kakuli kame ana ku limuka esi sili mu munu.

3

Jesu ni Nekudemasi

¹ Cwale kame kuna kwikalanga omulume no Mufalisi no litina lya Nekudemasi, omwendisi no Majuda.

² Woyo mulume sebeli oiya kwa Jesu ousiku ni kwamba kwa yonyene nji, “Labbi, kame tuyii nji yawene omwiyeti woyo otunda kwa Nyambe, kakuli kakwisa omunu otwesa okutenda etimakazo eti otenda, konji Nyambe aba ali ni yonyene.”

³ Jesu sebeli omu tambula nji, “Niti luli kame ni kwambela nji, omunu nji kaleiwa oubya, katwese okumona omubuso wa Nyambe.”

⁴ Nekudemasi sebeli wamba kwa Jesu nji, “Nga-sibine saleiwe omunu yowa kulubala kale? Ninji kame saukele kame mu lipumo lya Inawaye aka leiwe aka no wiili kame?”

⁵ Jesu sebeli otambula nj, “Niti luli kame ni kwaambela nj, konji omunu aba saleiwe ni meyi ni Mebo, ka twese okwingena mu mubuso wa Nyambe.

⁶ Esi sina leiwa ku unu sa unu, mi esi sina leiwa ku Mebo sa Mebo.

⁷ Olese okukomoka aba ni kwambela nj kame ofanene okuleyiwa oubya.

⁸ Emebo kame ifukela omo isinga, mi kame oyupa omulumo wayo, kono kuyii oko itunda noko ita. Yo ngeeso ni ku munu yonje woyo oleilwe ku Mebo.”

⁹ Nekudemasi sebeli oibanguta Jesu nj, “Ngasi-bine sa itendahale eyo?”

¹⁰ Jesu sebeli otambula nj, “Wene kame otendile omwiyeti no Isilaele, mi cwale eyi kawiyupisisa?

¹¹ Niti luli kame ni kwambela nj kame twamba eyi tu limukile, mi kame tupaka esi tuna mono, kono kutambula oupaki wetu.

¹² Aba nina kwambele eyi no litunga kausi pumena, ngasibine so pumene nj ni kwambela einu na kuwilu?

¹³ Kakwisa omunu woyo ona kambamene ku liwilu, konji woyo ona shetumuka okutunda ku liwilu, yonyene Omwana no munu.”

¹⁴ Cwale kanyi Mushe omo ana ku tulekela enyoka mu lihalaupa, Omwana no munu ni yonyene kame afanena okutulekiwa ngeeso,

¹⁵ nj cwale omunu yonje woyo opumena mwa yonyene aikale ni mooyo no kwaabwa.

¹⁶ Kakuli Nyambe kame ana singi onene elitunga, mane kame ana libi Mwanaye no libanda,

nji omunu yonje woyo opumena mwa yonyene alese okufa kono aikale ni mooyo no kwaabwa.

¹⁷ Kakuli Nyambe kasiku tuma Mwanaye mu litunga nji atule elitunga, kono neli nji elitunga liyoyisiwe mwa yonyene.

¹⁸ Woyo opumena mwa yonyene ka atuliwa, kono woyo nokwa pumena na atuliwa kale, kakuli kasi pumena mu litina lya Mwanaye Nyambe no libanda.

¹⁹ Cwale ino ekatulo, eliseli kame lineeyi mu litunga, kono aanu kame ana singi ouwi okubita eliseli kakuli emisebezi yoo niya kwiiba.

²⁰ Kakuli omunu yonge woyo otenda esi no kwiiba kame atimbile eliseli mi kaiyi ku liseli nji emisebezi yaye ilese oku nyaziwa.

²¹ Kono woyo otenda eyi no niti kame aiya ku liseli, nji ku monahale emisebezi yaye nji kame itundelela mwa Nyambe.

Jesu ni Jowani

²² Aba kuna kubwa eyo, Jesu na iyetwa aye sebeli ata mu naha no Judeya. Omo sebeli oikala noo ni kwa kolobeza.

²³ Jowani ni yonyene kame ana ku kolobeza mu Enoni, abeebi ni Salimi, kakuli ameyi kame ana kupula mo. Cwale aanu kame ana kwiyinga mane nikwakolobeza.

²⁴ Kakuli abo Jowani yokasi bekiwa kale mu tolongo.

²⁵ Cwale sebeli kwiiya etiñananyi mukaci no aiyetwa a Jowani ni Mujuda omunjili ba taba no kukenisiwa.

²⁶ Cwale sebeli aiya kwa Jowani ni kwamba nji, “Mwiyeti, omunu ona kwikala naye mu linjaliya no Jodani, yonyene uya ona kupaka, uno yokame kame akolobeza, mi aanu kame ata kwa yonyene!”

²⁷ Jowani sebeli otambula nji, “Omunu ka twese oku tambula esinu, konji esi ana biwi ku wilu.

²⁸ Anyi mwenyene kame muli apaki ange, kame ninaamba nji, ‘Kasa mene Kilesite, kono kame nina tumiwa balubala lwaye.’

²⁹ Woyo oli ni mukwaliwa yo mukwati, kono omulikani no mukwati, woyo oimanine ni kuyupa, kame awabelelwa onene aba ayupa eliywi no mukwati, cwalehe oku wabelelwa kwange naku petahala.

³⁰ Yonyene kame afanene okweekeza, mene ni tundise.”

Woyo Wiiya okutunda ku Wilu

³¹ Woyo wiiya okutunda ku wilu kame ali beulu no akwaye onje. Woyo otunda mu litunga ni wa litunga, mi kame aamba kanyi woyo no litunga, woyo otunda ku wilu yonyene kame ali beulu no akwaye onje.

³² Woyo opaka eso ana mono neso ana yupu, kono kamu pumene oupaki waye.

³³ Woyo ona pumene oupaki waye kame ana ongota nji Nyambe niwa niti.

³⁴ Kakuli woyo ona tumiwa kwa Nyambe kame aamba amaywi a Nyambe, kakuli Nyambe ka mubi Emebo no kwetekela.

³⁵ Sitange kame asinga Omwana, mi kame ana beeke einu yonje mu makaa aye.

³⁶ Woyo opumena mwa Mwana kame ali ni mooyo no kwaabwa, mi woyo no kwakuteka Omwana katamba okumona omooyo, kono okutweba kwa Nyambe kame kuli beulu yaye.

4

Jesu ni Mukati no Musamaliya

¹ Cwale Jesu aba ana kulimuka nji Afalisi kame ana kuyupa nji na kuwana ni ku kolobeza aiyetwa no kupula okubita Jowani,

² simba nji kasa Jesu ona ku kolobeza, kono neli aiyetwa aye,

³ cwale sebeli otunda mu Judeya ni ku ukela kame ku Galileya.

⁴ Cwale kame ana kubita endila eyi no Samaliya.

⁵ Cwale sebeli okeela mu muleneñi no Samaliya wisaniwa nji Sikale, ou uli abeebi ni litema lya Jakobo, elyo ana kuba Josefa mwanaye.

⁶ Ba kwikalile elisima lya Jakobo, mi cwale Jesu ona ku katala mu mweendo waye, sebeli oikala banji ku nyonga no lisima. Kame ina ku singa okukwana enako no hola no utanu ni kamweya (6) akamwii luli.

⁷ Cwale sebeli kwiiya omukati no Musamaliya mu kutekula ameyi, mi Jesu sebeli wamba kwa yonyene nji, “Onibe ku meyi ni nwee.”

⁸ Kakuli aiyetwa aye kame ana kuta mu mule-neñi mu kuula eilya.

⁹ Omukati no Musamaliya sebeli wamba kwa Jesu nji, “Wene Omujuda, kame oni kumbela ameyi mene me nili omukati no Musamaliya?”

(Kakuli Amajuda kasamo mu ukuwana ni Masamaliya.)

¹⁰ Jesu sebeli otambula omukati nji, “Kambe kame ona limuka empo ya Nyambe ni woyo wamba kwa wene nji, ‘Onibe ku meyi ni nwee,’ kambe kame ona mukumbele, mi kame sa kube ameyi no mooyo.”

¹¹ Omukati sebeli wamba kwa Jesu nji, “Mbumu, ku kwite esitekuliso, mi elisima kame litungile. Kubine ona kuwana ameyi no mooyo?”

¹² Ninji kame oli no kuneneba okubita sitetu Jakobo woyo ona kutuba elisima eli, mane kame anwa mo, yonyene na naaye ni tingombe taye?”

¹³ Jesu sebeli otambula omukati nji, “Woyo onwamo yonje mu meyi aa, kame safe elilyotwa kame,

¹⁴ kono woyo onwa ku meyi awo sani mube, katamba okufa elilyotwa, mi ameyi sani mube kame sa futuke mwa yonyene eliweluwelu no meyi no kububa okutwala ku mooyo no kwaabwa.”

¹⁵ Omukati sebeli wamba kwa Jesu nji, “Mbumu, onibe ku meyi awo, nji nilese okufa elilyotwa simba okwiiya kuno muku tekula ameyi.”

¹⁶ Jesu sebeli wambela omukati nji, “Ote, okaisane mbumowe, mi uuke kuno.”

¹⁷ Omukati sebeli otambula nji, “Mene sikwite mbumwange.”

Jesu sebeli wamba kwa yonyene nji, “Esi wamba sokame aba wamba nji, ‘Sikwite mbumwange’

18 kakuli kame ona kwikala na mbumowe atanu, mi woyo oikalile naye bano kasa mbumowe kame ona amba eniti.”

19 Omukati sebeli wamba kwa yonyene nji, “Molyange, kame nina mono nji tiwe omunuhi wa Nyambe.”

20 “Asitetu kame ana ku lapelelanga ba lilundu aba, kono anyi kame mwamba nji mu Jelusalema esibaka omo afanena aanu okulapelela.”

21 Jesu sebeli wamba kwa yonyene nji, “Mukati oni pumene, enako ikeyile abo sitange katamba oku lapelelwa ba lilundu aba simba mu Jelusalema.

22 Anyi kame mu lapela esi mwa limukile, Aci kame tu lapela esi tu limukile, kakuli oku yoyisiwa kame kutunda ku Majuda.

23 Kono enako ikeyile, mane ya iya kale, abo awo alapeli no niti kame sa lapele sitange ni mebo ni mu niti kakuli okame awo asaelwa kwa Sitange.

24 Nyambe nimebo, mi awo amulapela kame afanena oku mu lapela ni mebo ni mu niti.”

25 Omukati sebeli wamba kwa Jesu nji, “Kame ni limuka nji Mesiya kame aiya woyo oisanwa nji Kilesite. Aba sa keele, mba tu monisa einu yonje.”

26 Jesu sebeli wamba kwa yonyene nji, “Mene woyo wamba kwa wene, ya mene.”

27 Mu nako eyo aiyetwa aye sebeli akeela, mi sebeli akomoka oku muwana yo amba ni mukati, kono kakwisa simba mumweya ona ku mwambisa nji, “Siikene eso osaela?” Simba nji, “Iikene eyo onaamba naye?”

²⁸ Cwale omukati sebeli osiya esitekulo saye no meyi ni kuukela mu muleneñi, nuuka ambela aanu nji,

²⁹ “Mwiiye mu mone omunu woyo ona nambele eyi yonje nina tende. Mwendi yokame Kilesite?”

³⁰ Cwale sebeli atunda mu muleneñi ni kwiiya kwa Jesu.

³¹ Ababo asiiya feela, aiyetwa sebeli amu kumbela nji, “Labbi, olye esinjili!”

³² Kono Jesu sebeli wamba kwa onyene nji, “Kame nili ni silya no kulya eso mwalimukile.”

³³ Cwale aiyetwa sebeli akwambela omunjili ku munjili nji, “Kame kuli omunu ona mulitele esi no kulya?”

³⁴ Jesu sebeli wamba kwa onyene nji, “Esilya sange ninji ni tende eso si singwa kwa woyo ona ni tumu, mi ni manenene omusebezi waye.

³⁵ Esi kame mwamba nji, ‘Ku sili ni tikweti tinee, okutwala abo sakuka yangulelwe.’ Kono kame ni myambela nji, mu none amiyo enu, mwa likete amatema, kakuli sebeli aimba ouloto nji uyanguliwe.

³⁶ Woyo oyangula kame awana mu musebezi waye, niku ungeka embuya no mooyo no kwaabwa, nji cwale woyo osikukuna ni woyo oyangula awabelelwe bamweya.

³⁷ Mo kumonahalela eniti no taba eyi yaamba nji, ‘Omunjili kame akuna, omunjili kame ayangula.’

³⁸ Kame nina mi tumu oka yangula eyo ka mwa si sebeza, anjili kame ana sebeze, mi na mwingene mu musebezi woo.”

³⁹ Amasamaliya no kupula na mu muleneñi owo sebeli apumena mwa Jesu mulibaka no mukati woyo ona kupaka nji, “Kame ana nambele eyi nina tende yonje.”

⁴⁰ Cwale Amasamaliya aba ana kwiiya kwa yonyene, sebeli amu kumbela nji aikale noo, mi sebeli oikala noo amaywaa ayiili.

⁴¹ Mi anjili no kupula sebeli a pumena kwa yonyene, mulibaka no liywi lyaye,

⁴² ni kwamba ku mukati nji, “Cwale aba tu pumena, kasa mu liywi lyowe, kakuli twenyene natu kuyupele, mi kame tu limuka nji yokame luli Omuyoyisi no litunga.”

Jesu yo Balisa Omwana no Nduna

⁴³ Munyima no maywaa ayiili, Jesu sebeli oukela ku Galileya.

⁴⁴ Kakuli Jesu yonyene sebeli wamba nji, “Omunuhi wa Nyambe kakutekiwa mu naha yaye.”

⁴⁵ Cwale Jesu aba ana kukeela mu Galileya, sebeli oka tambulwa wino ku Magalileya ana ku mona eyi ana kutenda yonje mu Jelusalema ku mukiti, kakuli nonyene kwana kuta ku mukiti.

⁴⁶ Cwale Jesu sebeli oiya kame mu Kana no Galileya, omo ana ku futula ameyi okwatenda ewaine. Cwale mu Kapenauma kame kuna kwikala onduna omunjili no molyaye woyo mwanaye neli omweeti.

⁴⁷ Aba ana kuyupa nji Jesu neeyi mu Galileya okutunda ku Judeya, sebeli oiya kwa yonyene, ni ku mukumbela nji ashetumuke muku balisa

mwanaye no mulume, kakuli kame ana kwikala abeebi ni kufa.

⁴⁸ Jesu cwale sebeli wamba kwa yonyene nji, “Konji aba sa mumone etiponiso ni timakazo okubinda samu pumene.”

⁴⁹ Onduna sebeli omu tambula nji, “Mbumu, oshetumuke mwanange yo kasifa kale.”

⁵⁰ Jesu sebeli wamba kwa yonyene nji, “Ote, mwanowe kame ayoya!”

Omulume woyo sebeli opumena eliywi lya Jesu nuukutela.

⁵¹ Yosi shetumuka ngeeso, abika aye sebeli amu waniketa ni ku mwambela nji, “Mwanowe kame ayoya!”

⁵² Cwale sebeli waibanguta enako ana ku tangisa omwana okwikala wino, mi sebeli aamba kwa yonyene nji, “Bingolwa ba nako no utanu ni twiili akamwii (13 okuloko) elitomapa sebeli limu lesela.”

⁵³ Cwale sitaye sebeli olimuka nji yokame enako ana kwamba Jesu nji, “Mwanowe kame ayoya.” Mi sebeli opumena yonyene na sindoo yaye onje.

⁵⁴ Eyo neli emakazo no wiili ana kutenda Jesu aba ana kwiiya mu Galileya, okutunda ku Judeya.

5

Oku Balisa mu Kasa

¹ Aba kuna kubwa eyo, sebeli ku tendahala omukiti no Majuda mi Jesu sebeli okambamena ku Jelusalema.

² Cwale mu Jelusalema abeebi ni Mwelo no Mikoko, kame kuli akasa kaisanwa nji Betizata mu Sihebelu, no myelo itanu.

³ Mu myelo eyo kame kuna kulangana aeti no kupula, eibofu, eihole no makondo, nasi luñañali.

⁴ [Kakuli abanjili elingeloi kame lina ku shetumukelanga mu kasa, mi kame lina kushelaulanga ameyi. Cwale omunu no weli woyo oingena mu meyi aba amana okushelauliwa, kame ana ku tuseha, simba otoma oweti ubine nji ubine.]

⁵ Omulume mumweya kame ana kwikalanga omo, ona kutoma oweti emyaka makumi aatu ni mutanu ni twaatu (38).

⁶ Cwale Jesu aba ana kumumona ni kulimuka nji kame ana kulanganamo enako no kuleba, sebeli omwibanguta nji, “Kame osinga oku balisiwa?”

⁷ Omweeti sebeli omu tambula nji, “Mbumu, sikwite omunu no ku ni beeka mu kasa ameyi aba amana okushelauka, aba nisinga nji niingenemo omukwange wa nisiya kale oku shetumukamo oweli.”

⁸ Jesu sebeli wamba kwa yonyene nji, “Imana, oshimbe oulangano wowe, mi weende.”

⁹ Ababo omulume sebeli obala, ni ku shimba oulangano waye, mi sebeli weenda.

Cwale eliywaa elyo neli elino Pumulo.

¹⁰ Cwale aendisi no Majuda sebeli ambela woyo mulume ona ku balisiwa nji, “Lino ni lya Pumulo, ka kupumenenwe nji oshimbe oulangano wowe.”

¹¹ Kono sebeli waatambula nji, “Omunu woyo onani balisa na nambele nji, ‘Oshimbe oulangano wowe mi weende.’ ”

¹² Cwale sebeli amwibanguta nji, “Anyine omunu woyo ona kwambele nji oshimbe oulangano wowe mi weende?”

¹³ Kono omunu woyo ona ku balisiwa kasi kulimuka nji anyine, kakuli Jesu kame ana kwikiseta mu kupula no aanu ana kwikala omo mu sibaka.

¹⁴ Kutunda abo, Jesu sebeli omu wana mu Ndooya Nyambe ni kwamba kwa yonyene nji, “Omone, nu bala kono olese okutenda esibi kame, mwendi esi sicilisa oku bitelela mba si kwiyele.”

¹⁵ Omulume woyo sebeli ota nu kambela aendisi no Majuda nji neli Jesu ona mubalisa.

¹⁶ Cwale esi sokame eso aendisi no Majuda ana kuyandiseta Jesu, kakuli na kutenda eyo eli no Pumulo.

¹⁷ Kono Jesu sebeli waatambuta nji, “Sitange kame asebeza enako yonje, mi ni mene kame ni sebeza.”

¹⁸ Elibaka elyo aendisi no Majuda ana kusinga oku mwibaela okubita ba weli, kakuli kasi kumatuka feela omulawo no Pumulo, kono kame yonyene ni kwisana Nyambe nji Sitaye mane nuukubeeka ba siyemo simweya ni Nyambe.

Amaata no Mwana

¹⁹ Cwale Jesu sebeli waambela nji, “Niti luli kameni myambela nji, Omwana katwese okutenda esinu yonyene, konji ana kumona Sitaye yo sitenda. Kakuli eyo atenda yonje, ni yonyene Mwana kame aitenda ngeeso.

²⁰ Kakuli Sitaye kame asinga Omwana, mane kame amu monisa eyo atenda yonje, mi mba mumonisa emisebezi no kuneneba okubita eyi nji mu komoke.

²¹ Kakuli kanyi Sitange aba aingula asikufa ni kwa yoyisa, ni Mwana yongeeso kame aaba awo asinga.

²² Sitange kaatula omunu, kono kame anabi Omwana etikatulo tonje,

²³ nji onje awo akuteke Omwana kanyi omo akutekela Sitange. Woyo no kwakuteka Omwana ka kuteke ni Sitange ona mu tumu.”

²⁴ “Niti luli kame ni myambela nji, woyo oyupa eliywi lyange ni ku pumena kwa woyo onani tumu, kame ali ni mooyo no kwaabwa. Ka tamba okwatuliwa, kono nabiti mu lifu okwingena mu mooyo.

²⁵ Niti luli kame ni myambela nji, enako kame iiya, mane yaiya kale, abo aafu kame sa yupe eliywi lya Mwana Nyambe, mi awo aliyupa mba yoyo.

²⁶ Kakuli kanyi Sitange aba ali ni mooyo mwa yonyene, ni Mwana ngeeso kame ana mubi okwikala ni mooyo mwa yonyene.

²⁷ Mi na mubi ni maata no kwatula, kakuli yokame Omwana no Munu.

²⁸ Mulese ku komoka ba taba eyo, kakuli enako kame iiya, abo aali mu mayumbelo onje mba yupu eliywi lyaye,

²⁹ mi awo ana tende eino kuwaba aingukele omooyo, mi awo ana tende eino kwiiba aingukele ekatulo.”

Oupaki kwa Jesu

³⁰ “Sitwese okutenda esinu mu maata ange, kanyi aba niyupa, kame na tula, mi ekatulo yange ya kuluka, kakuli sitende esisi singwa kwa mene, kono esisi singwa kwa yonyene onani tumu.”

³¹ “Nji kame ni kupaka menyene, oupaki wange kasa wa niti.

³² Kwaali omunjili woyo opaka eyange, mi kame niyii nji oupaki owo ani paka nawo niwa niti.

³³ Kame muna tumu aanu kwa Jowani, mi na paka eniti.

³⁴ Kasa nji oupaki nina tambula kame onatundu ku munu, kono kame naamba feela eyo nji mu kayoyisiwe.

³⁵ Yonyene neli olumonyi lu tumbuka, ni lambi eyi imonyeka, mi anyi namu singi oku wabelelwa enako icana mu liseli lyaye.

³⁶ Kono oupaki nili nawo ni wa kuneneba oku-bitelela wa Jowani, kakuli emisebezi ana nibi Sitange oku manenena, yokame emisebezi eyi nitemba, eini paka nji Sitange nani tumu.

³⁷ Cwale Sitange ona nitumu, ni yonyene kame ana paka eyange. Eliywi lyaye ka musili yupa simba okumona omo aikalele,

³⁸ mi eliywi lyaye kali siikala mwaanyi, kakuli woyo ona tumiwa kwa yonyene kamu mupumene.

³⁹ Kame musaisisa amañolo, kakuli kame mu yambuta nji mba mu wanamo omooyo no kwaabwa. Amañolo awo okame apaka eyange!

⁴⁰ Kono kame mukana okwiiya kwa mene nji mwikale ni mooyo no kwaabwa.

⁴¹ “Sitambula okububekwa oko kutunda kwaanu.

⁴² Kono kame ni yii nji kakwisa elilato lya Nyambe mwaanyi.

⁴³ Mene kame nineyi mu litina lya Sitange, mi ka mu sini tambula, nji mundina aiye mu litina lyaye

feela, yonyene mbamu mu tambula.

⁴⁴ Ngasibine sa mu pumene woyo otambula emilumbeko itunda kwaanu, mi ka musaele emilumbeko itunda feela kwa Nyambe?

⁴⁵ Mu lese oku yambuta nji kame sani mikandimeke kwa sitange, neli Mushe woyo ona kumikandimeka, ba yonyene bamuna kubeeka esepo yenu.

⁴⁶ Nji kame mu na kupumena Mushe, ni mene mba muni pumene, kakuli yonyene na ñolo eyange.

⁴⁷ Kono nji kamwa sipumena eyo ana kuñola, ngasibine sa mu pumene amaywi ange?”

6

*Jesu yo Fepa Aanu no Kukwana Eikiti Itanu
(Mateu14.13-21; Maleka6.30-44; Luka9.10-17)*

¹ Aba kunabu eyo, Jesu sebeli ota mu linjaliya no liwate no Galileya, eliwate no Tibeliyasi.

² Mi aanu no kupula onene sebeli amukoña, kakuli kame ana ku mona etimakazo eti ana kutenda kwa asikutoma.

³ Cwale Jesu sebeli okambamena ba lilundu, mi abo sebeli okaikala banji na iyetwa aye.

⁴ Cwale Epaseka, omukiti no Majuda kame ona kwikala abeebi.

⁵ Jesu aba ana kwaliketa cwale sebeli omona aanu no kupula onene aiya kwa yonyene, mi sebeli wambela Filipi nji, “Kubine sa tuule einkwa nji cwale aa aanu awane esi no kulya?”

⁶ Eyi kame ana kuyamba ngeeso oku mweteka, kakuli yonyene kame ana ku limuka esi ana kufanena okutenda.

⁷ Filipi sebeli omutambula nj, “Emyanda yi-ili (200) no muwaya-wayaya ka yuulu einkwa no kupula nj omunjili ni munjili awane esino kucaniba feela.”

⁸ Omunjili no aiyetwa aye, Andiliyasi mina Simoni Pitolosi, sebeli wamba kwa yonyene nj,

⁹ “Kame kuna kwikala ondumbana omo, ona kwikala ni inkwa itanu ni tusi twiili. Kono eyo ni iikene kwaanu no kupula ngeeso?”

¹⁰ Jesu sebeli waambela nj, “Mwiikate aanu banji.” Abo kame kuna kwikala omoopu no kupula onene ba sibaka eso, cwale alume sebeli aikala banji, mu palo no kukwana eikiti itanu (5;000).

¹¹ Cwale Jesu sebeli oshimba einkwa, cwale aba ana kumana ouku tumela, sebeli otabela awo ana kwikala banji, mi cwale sebeli otenda ngeeso niku tindi, cwale sebeli waaba omu ana kusingela.

¹² Cwale aba ana kumana okwikuta, sebeli wambela aiyetwa aye nj, “Mu tole oubulumusi ona siyalabo, nj ku lese oku yumbiwabo esinjili.”

¹³ Cwale sebeli autola mane ni kwiyata amatanda likumi na yiili no inkwa itanu, ou ona ku siiwa kwa sikulya.

¹⁴ Cwale aanu aba ana kumona emakazo ana kutenda Jesu, sebeli aamba nj, “Niti luli yokame omunuhi wa Nyambe ona kufanena okwiiya mu litunga!”

¹⁵ Cwale Jesu aba na limuka nj kame ana ku singa oku mulema nj atendiwe ombumu, sebeli okutela kame yomboci ba lilundu.

Jesu yo Enda ba Meyi
(Mateu14.22-33; Maleka6.45-52)

16 Cwale aba kuna kutenda amangolwaa, aiyetwa aye sebeli ashetumuka ku liwate,

17 ni kwingena mu wato, niku tangisako oku lutela mu linjaliya no liwate okuta ku Kapenauma. Neli ousiku luli, mi Jesu yoka sikeela kale kwa onyene.

18 Cwale sebeli kwinguka amandinda mulibaka no mebo ina kufuka onene.

19 Aba ana kumana okupuwa etibima taatu simba tinee, sebeli amona Jesu yo enda ba liwate, ni kusheeteta ku wato, cwale sebeli acila onene.

20 Kono sebeli wamba kwa onyene nji, “Meene, mu lese kucila!”

21 Cwale sebeli awabelelwa ni kumulonga mu wato, mi ababo owato sebeli ofuwama ba likamba abo ana kulumba.

Aanu aba ana ku Saela Jesu

22 Ba liywaa lina ku tatamako, aanu awo ana kusiyala mu linjaliya no liwate, sebeli alemuha nji kakwa siku siyala owato omunjili muya. Cwale Jesu kasi kwingena mu wato na iyetwa aye, kono aiyetwa aye kame ana kuta omboci.

23 Simbakulingeeso cwale amato anjili ana ku tunda mu Tibeliya, me akeela kale abeebi ni sibaka eso ana kulyela einkwa Ombumu aba ana kumana ouku tumela.

24 Cwale aanu aba ana kumona nji Jesu kasi kwikalamo, simba aiyetwa aye, onyene sebeli aingena mu maato omo ni kuta ku Kapenauma alemine oku saela Jesu.

Jesu Esinkwa no Mooyo

²⁵ Cwale aba ana kuwana Jesu mu linjaliya no liwate, sebeli amwibanguta nj, “Labbi, ka mwaka oneyi kuno?”

²⁶ Jesu sebeli waatambula nj, “Niti luli kame ni myambela nj, aba mu ni saela, kasa nj na mumono etimakazo, kono ninji na muli einkwa mane na mwikuta.

²⁷ Mu lese oku sebeleza esilya eso sibwa, kono esilya eso simi twala ku mooyo no kwaabwa. Eso Omwana no Munu asa mibe, kakuli ba yonyene Nyambe Sitange kame ana mubeeke eliswayo.”

²⁸ Cwale sebeli amwibanguta nj, “Tikene satu tende, nj tu tende emisebezi ya Nyambe?”

²⁹ Jesu sebeli waatambula nj, “Uno omusebezi wa Nyambe nj mu pumene kwa woyo ona tumiwa kwa yonyene.”

³⁰ Cwale sebeli aamba kwa yonyene nj, “Kaike emakazo sotende nj tumone, mi tu pumene kwa wene? Kamwike omusebezi otenda?

³¹ Asitetu kame anali amaana mu lihalaupa, kanyi aba kuñolilwe nj, ‘Na kwaaba esinkwa eso situnda ku wilu nj alye.’ ”

³² Jesu sebeli waambela nj, “Niti luli kame ni myambela,” “Mushe kasi kumiba esinkwa naku wilu, kono Sitange na mibi esinkwa no niti naku wilu.

³³ Kakuli esinkwa sa Nyambe sokame eso situnda ku wilu mi kame siba omooyo ku litunga.”

³⁴ Sebeli aamba kwa yonyene nj, “Mbumu, otube esinkwa eso mu nako yonje.”

³⁵ Cwale Jesu sebeli waambela nj, “Time esinkwa no mooyo,” “Woyo oiya kwa mene ka

tamba okuyomba, mi woyo opumena kwa mene katamba okufa elinyotwa.

³⁶ Kono kame nina myambele nji namu nimono kono kamu sipumena.

³⁷ Sonje esi aniba sitange, kame sa siiye kwa mene. Cwale woyo oiya kwa mene sitamba oku mucitela kundee.

³⁸ Kakuli kame nina shetumuka okutundu ku wilu kasa mu kutenda eso si singwa kwa mene, kono esi si singwa kwa woyo ona ni tumu.

³⁹ Mi sokame eso si singwa kwa woyo ona ni tumu, nji ni lese oku taukelwa ku sinjili kweeyo ana nibi yonje, kono ni iingule mu liywaa no mamananeneno.

⁴⁰ Kakuli sokame eso si singwa kwa Sitange nji omunu yonje woyo omona Omwana ni ku pumena mwa yonyene aikale ni mooyo no kwaabwa. Mi mba ni mwingula ba liywaa no mamananeneno.”

⁴¹ Amajuda sebeli añuñuta mulibaka lyaye, kakuli kame ana kwamba nji, “Time esinkwa esi situnda ku wilu.”

⁴² Cwale sebeli aamba nji, “Kasa yokame Jesu, omwana Josefa, woyo sitaye ni inawaye tu yii? Ngaibi aamba nji, kame ni tunda ku wilu?”

⁴³ Jesu sebeli waatambula nji, “Mu lese okuñuñuta mukaci kenu.

⁴⁴ Kakwisa omunu soiya kwa mene konji aba sakokiwe kwa sitange ona ni tumu, mi mene mba ni mwingula ba liywaa no mamananeneno.

⁴⁵ Kame ina ñoliwa mwa nuhi a Nyambe nji, ‘Omunu yonje mba iyetiwa kwa Nyambe.’ Cwale omunu yonje woyo ona yupu mane ni kwiyetiwa kwa Sitange kame aiya kwa mene.

⁴⁶ Kasa nji kame kuli omunu ona mono Sitange, konji yonyene woyo ona tundu kwa Nyambe yonyene ona mono Sitange.

⁴⁷ Niti luli kame ni myambela nji, woyo opumena kwa mene kame ali ni mooyo no kwaabwa.

⁴⁸ Time esinkwa no mooyo.

⁴⁹ Asitenu naali amaana mu lihalaupa, mi naafu.

⁵⁰ Kono sino esinkwa esi situnda ku wilu, nji omunu olyako alese okufa.

⁵¹ Time esinkwa no kuyoya, esi sina tundu ku wilu. Omunu nji alye esinkwa eso, kame sa yoye enako yonje. Mi esinkwa sa nibe oku yoyisa elitunga, enyama yange.”

⁵² Cwale Amajuda sebeli aku kananisa mukaci koo nji, “Omunu uyu ngaibi sa tube enyama yaye nji twiilye?”

⁵³ Jesu sebeli wamba kwa onyene nji, “Niti luli kame ni myambela konji aba sa mulye enyama no Mwana no Munu ni kunwa ounyinga waye, omooyo kausako mwaanyi.

⁵⁴ Woyo yonje solya enyama yange ni kunwa ku unyinga wange, kame sa ikale ni mooyo no kwaabwa mane mbani mwingula ba liywaa no mamananeno.

⁵⁵ Kakuli enyama yange, silya luli ni unyinga wange wa kunwa luli.

⁵⁶ Woyo olya ku nyama yange ni kunwa ku unyinga wange kame ali mwa mene, ni mene mwa yonyene.

⁵⁷ Kanyi Sitange no kuyoya aba anani tumu, mane niku yoya mulibaka lya sitange, cwale woyo

onilya kame sa yoye mulibaka lyange.

⁵⁸ Esi sokame esinkwa sina tundu ku wilu, ka siku feke neso anali asitenu ni kufa. Woyo olya ku sinkwa esi mba yoyo enako yonje.”

⁵⁹ Jesu kame ana kwamba etaba eyo mu ndoo no milapelo kanyi omo ana kwiyetela mu Kape-nauma.

Amaywi no Mooyo no Kwaabwa

⁶⁰ Anjili no kupula kwa iyetwa aye, aba ana kuyupa eyo sebeli aamba nji, “Omwambelo uno niwa kubambaba. Anyine so uteeteta?”

⁶¹ Kono Jesu naku limuka mu mucima waye nji aiyetwa aye kame añuñuta ba taba eyo, sebeli wamba kwa onyene nji, “Ninji etaba eyo kame imi sitatalisa?”

⁶² Cwale ngasibine saku tendahale abasa mumone Omwana no munu yo kambamena oko ana kwikala oweli?

⁶³ Emebo yokame eyi iba omooyo, enyama ka itusu esinjili. Amaywi nina myambele okame mebo ni moyo.

⁶⁴ Kono muno mwaanyi kwaali anjili no kwa pumena.” Kakuli Jesu kame ana kulimuka ku matangiseto awo saulwe oku pumena, ni woyo somu beteka.

⁶⁵ Cwale sebeli wekeza okwamba nji, “Lyo kame elibaka nina myambele nji kakwisa woyo soiya kwa mene konji woyo ona biwi ngeeso kwa Sitange.”

⁶⁶ Okutunda abo, ano kupula kwa iyetwa aye sebeli aukela munyima okulesa oku mukoña okweenda naye.

⁶⁷ Jesu sebeli wamba kwawo ana kukwana likumi na yiili nji, “Naanyi kame musinga oukutela ngeeso?”

⁶⁸ Simoni Pitolosi sebeli omu tambula nji, “Mbumu, kame sa tute kwa nyine? Kame oli ni maywi no mooyo no kwaabwa.

⁶⁹ Cwale aci natu pumene ni kulimuka nji ya wene no Kukena wa Nyambe.”

⁷⁰ Jesu sebeli waatambula nji, “Kasa mene nina mikete moonje ano kukwana likumi na yiili? Cwale omunjili kwaanyi ni mudimona!”

⁷¹ Kame ana kwamba Judasi Omwana Simoni Isikalioti, kakuli yokame omunjili no asikukwana likumi na yiili (12) yoso mu beteka.

7

Jesu na Inaaye

¹ Aba ku nabwi eyo, Jesu sebeli ota yo iyeta aanu mu Galileya, kasi kusinga okuta mu Judeya, kakuli aendisi no Majuda kame ana kusinga oku mwibaa.

² Cwale omukiti no Majuda ona kwisaniwa nji Tabanakele (eikuñwa) kame ana kwikala abeebi,

³ cwale ainaye Jesu sebeli aamba kwa yonyene nji, “Otunde muno mi ote ku Judeya, nji aiyetwa owe amone emisebezi eyi otenda.

⁴ Kakuli kakwisa omunu osebeleza ku mukunda nji kame asinga okulimukiwa wino. Nji kame otenda einu eyi, oku monahaze wenyene ku litunga!”

⁵ Kakuli simba onyene ainaye kasi kupumena mwa yonyene.

⁶ Jesu sebeli wamba kwa onyene nji, “Enako yange ka isikeela kale, kono enako yenu kame iliko enako yonje.

⁷ Elitunga kali twese oku mitimba, kono kame litimbile mene, kakuli kame nipaka emisebezi ya lyo nji niya kwiiba.

⁸ Anyi mute ku mukiti. Mene ka niti ku mukiti owo, kakuli enako yange ka isi petahala kale.”

⁹ Aba ana ku mana okwamba eyo, sebeli osiyala mu Galileya.

Jesu yoli ku Mukiti no Ikuñwa

¹⁰ Kono munyima no ainaye okuta ku mukiti, cwale ni yonyene sebeli otako, kasa mu uku monahaza, kono mu kwa limukiwa.

¹¹ Cwale aendisi no Majuda ba mukiti sebeli a musaela, ni kwibanguta nji, “Ku bine ali?”

¹² Mi oko kame kuna kwikala onene eyi no kumooba. Anjili sebeli aamba nji, “Jesu niwa kuluka,” Anjii nji, “Kokuulwa, kame ayaukisa aanu.”

¹³ Mulibaka no kucila aendisi no Majuda kakwisa omunu ona kwamba eyaye mu kulukuluha.

¹⁴ Bakaci no Mukiti Jesu sebeli okambamena ku Ndoo ya Nyambe nuuka iyetamo.

¹⁵ Aendisi no Majuda sebeli a komoka ni kwamba nji, “Ngasibine aikalile uyu munu aba alimukile, mi ka siku kwiiyeta?”

¹⁶ Jesu sebeli waatambula nji, “Etuto yange ka itundu kwa mene, kono kame itunda kwa woyo onani tumu.

¹⁷ Nji omunu omunjili kame asinga okutenda esisi singwa kwa Nyambe kame sa limuke etuto

yange nji kame itunda kwa Nyambe, nji kame ni kwambela feela menyene.

¹⁸ Woyo okwambela mu maata aye yonyene kame asinga ekanya yaye feela. Kono woyo osinga ekanya ya woyo ona mutumu niwa niti, mi kakwisa okwiiba mwa yonyene.

¹⁹ Kasa nji Mushe kasi kumiba omulawo? Kono kakwisa mwaanyi ona mamele omulawo. Iikene mu saelela okuni ibaa?”

²⁰ Aanu sebeli atambula nji, “Kame okwite edimona.” “Anyine woyo osaela oku kwibaa?”

²¹ Jesu sebeli waatambula nji, “Kame nina tende omusebezi mumweya, mi moonje kame mu na ukomoka.

²² Mushe na ku miba omulawo no mupato (kasa nji kame utunda kwa Mushe, kono kame utunda kwa Sitenu naku kale), mi anyi kame mu beeka omunu mu mupato eli no pumulo.

²³ Nji cwale eli no Pumulo omunu kame abekiwa mu mupato nji omulawo wa Mushe omameliwe, iikene muni kaniseta oku balisa omunu olutu lwaye lonje ba liywaa elino pumulo?

²⁴ Mu lese okwatula ni sobozi, kono mwatule mu kuluka.”

Yokame Kilesite?

²⁵ Cwale anjili aanu namu Jelusalema sebeli aamba nji, “Kasa yokame uyu mulume asaela okwibaa?”

²⁶ Mi yokame uno, kame aamba patalaza, mi kakwisa esinjili esi aamba kwa yonyene! Ninji aendisi no Majuda nalimuka nji luli yokame Kilesite?

²⁷ Kono kame tuyii oko atunda wuyu munu, mi cwale Kilesite aba sa monahale, kakwisa woyo so limuka oko sa tunde.”

²⁸ Cwale Jesu sebeli wamba kanyi omo ana kwiyetela ba patelo no Ndoo ya Nyambe nji, “Kame muni limukile ni kulimuka oko ni tunda? Kono kani siku kulita menyene, woyo onani tumu niwa niti, mi yonyene mwa limukile.

²⁹ Mene ni muyii, kakuli kame ni tunda kwa yonyene mi yokame onani tumu.”

³⁰ Cwale sebeli aeteka oku mununga, kono kame kuna kuulwa omunu no ku mulema, kakuli enako yaye kaya si kukeela kale.

³¹ Cwale aanu no kupula sebeli apumena mwa yonyene ni kwamba nji, “Cwale Kilesite aba sa iye, kame sa tende etimakazo no kupula okubita eti anatende wuyu mulume?”

Atateleli Atumiwa oka Nunga Jesu

³² Afalisi sebeli ayupa aanu no kupula alemine okumooba, cwale apulisita akulu na Falisi sebeli atuma amapolisa oka mununga.

³³ Jesu sebeli wamba nji, “Ni sili naanyi enakoicana, mi cwale kame sa nite kwa woyo onani tumu.

³⁴ Mba muni saele, kono kamu tamba ku niwana, mi kamu twese okwiiya omu nili.”

³⁵ Cwale aendisi no Majuda sebeli akwambisa omunjili ku munjili nji, “Kubine sate wuyu munu, nji tu kwangwe oku muwana? Ninji kame sate ku Magelike, aka iyete Amagelike?

³⁶ Iikene eyo atalusa aba aamba nji, mba muni saele kono ka mutamba kuni wana, mi oko nili kamutwese okwiyako?”

Otusindi no Mooyo kame Tuba Ameyi

³⁷ Ba liywaa noku manenena omukiti, eliywaa no utokwa, Jesu sebeli oimana ni kwamba nji, “Omunu aba afile elinyotwa aiye kwa mene mi anwe,

³⁸ mi woyo opumena mwa mene, kanyi amañolo omo ambela nji, ‘Okutunda mu mucima waye kame sa kubube emisindi no meyi ayoyisa.’”

³⁹ Cwale eyi kame ana kwamba eyi no Mebo, eyo awo apumena mwa yonyene asa fanene ok-witambula. Kakuli abo Emebo eka yasibiwa kale, mulibaka lya Jesu yo kasi ku yeemiwa kale.

Oukutaba mukaci no Aanu mulibaka lya Jesu

⁴⁰ Cwale aba ana kuyupa amaywi awo, aanu anjili sebeli aamba nji, “Luli yokame omunuhi wa Nyambe!”

⁴¹ Anjili sebeli aamba nji, “Yokame Kilesite!”

Kono anjili sebeli aamba nji, “Ninji Kilesite kame sa fanene okutunda mu Galileya!

⁴² Kasa nji elinolo kame lyamba nji Kilesite kame sa tunde mu lusika lwa Dabida mi kame atunda mu Betelehema, omundi ana kwikala Dabida.”

⁴³ Cwale sebeli kwiiya oukutaba mukaci no aanu mulibaka lyaye.

⁴⁴ Cwale anjili sebeli asinga oku mununga, kono kakwisa ona kubeeka elyooko ba yonyene.

Amaata no Aendisi no Majuda no kwa Pumena

⁴⁵ Cwale amapolisa sebeli aukela kwa pulisita akulu ni kwa Afalisi, awo ana kwaibanguta nji, “Tikene aba kamwasi mulita?”

⁴⁶ Amapolisa sebeli atambula nj, “Simba kwatanga kakwisa omunu onaamba kanyi omunu wuyu!”

⁴⁷ Cwale Afalisi sebeli aatambula nj, “Ninji naanyi na moongiwa?”

⁴⁸ Kwa endisi no Majuda ni kwa Afalisi kame kuli awo ana pumene mwa yonyene?

⁴⁹ Kono aanu no kupula aa, awo no kwa limuka omulawo, kame akutilwe!”

⁵⁰ Nekudemasi ona kukutangeta okuta kwa Jesu mi yoli omunjili kwa onyene sebeli waambela nj,

⁵¹ “Kana omulawo wetu kame otwesa okwatula omunu yo kasi yupa oweli ni kukwiyeta esi ana tende.”

⁵² Sebeli atambula nj, “Ni wene kame otunda mu Galileya? Osingisise mi mbu mono nj kakwisa omunuhi wa Nyambe so imekwa okutunda mu Galileya.” [

⁵³ Cwale omunjili ni munjili sebeli okutela ku ndoo yaye.

8

Omukati ona ku Lemiwa yo Buka

¹ Cwale Jesu sebeli ota ba lilundu no itondo no Olibe.

² Amasiku luli Jesu kame sebeli oukela ku patelo no Ndoo ya Nyambe. Aanu onje sebeli aiya kwa yonyene, cwale sebeli oikala banji ni kwaiyeta.

³ Cwale aiyeti no mulawo na Falisi sebeli alita omukati onaku waniwa yo buka ni kumubeeka mukaci koo.

⁴ Sebeli aamba kwa Jesu nj, “Mwiyeti, omukati wuyu kame ana waniwa yo buka.

⁵ Cwale mu mulawo, Mushe kame ana tu laele okwibaa ni mawee aa no ngeeso. Wene ngasibine wamba mulibaka lyaye?”

⁶ Esi kame ana kwamba ngeeso oku mweteka, nji atwese oku mukandimeka. Kono Jesu sebeli oinamena banji yo ñola ni munwe waye.

⁷ Cwale alemine okwekeza oku mwibanguta, Jesu sebeli oinumuka ni kwamba kwa onyene nji, “Nji omunjili mukaci kenu no kwatenda esibi atende wuyu no matatekelo okukonda eliwee ba yonyene.”

⁸ Cwale sebeli oinama kame ni kuñola ni munwe waye banji.

⁹ Kono aba ana kuyupa eyo, sebeli akutela omunjili ni munjili oku tangiseta kwa kulu oweli. Jesu sebeli osiyala yomboci, omukati yo imanine balubala lwaye.

¹⁰ Cwale Jesu sebeli oinumuka ni kwamba kwa yonyene nji, “Mukati kubine ali aanu? Kakwisa wuyu ona kubi omubonda?”

¹¹ Omukati sebeli otambula nji, “Kakwisa omunu, Mbumu.”

Cwale Jesu sebeli wamba kwa yonyene nji, “Ni mene sikubi omubonda. Ote, mi olese okutenda esibi kame.”]

Jesu Eliseli no Litunga

¹² Jesu kame sebeli wamba kwa onyene nji, “Time eliseli no litunga,” “Woyo oni koña katamba okwenda mu uwi, kono kame sa ikale ni liseli no mooyo.”

¹³ Cwale Afalisi sebeli aamba kwa yonyene nji, “Kame okupaka wenyene, oupaki wowe kasa wa niti.”

¹⁴ Jesu sebeli otambula nji, “Naba niku paka menyene, oupaki wange ni wa niti kakuli kame ni limuka omu ni tunda, nomu nita. Kono anyi ka mulimukile omuni tunda nomu nita.

¹⁵ Anyi kame mwatula ni unu, mene kani atula omunu.

¹⁶ Cwale naaba sani atule, ekatulo yange niya niti, kakuli kasa mene memboci natula, kono kame natula ni sitange ona ni tumu.

¹⁷ Mu mulawo wenu kame kuñolilwe nji oupaki no aanu ayiili niwa niti.

¹⁸ Time niku paka menyene, mi sitange ona ni tumu kame ani paka ni yonyene.”

¹⁹ Cwale sebeli aamba kwa yonyene nji, “Okwali Sitowe?” Jesu sebeli otambula nji, “Kamu niyii, simba Sitange kamu muyii,” “Nji kambe namu kuni limuka, kambe ni sitange namu mulimuka ngeeso.”

²⁰ Jesu kame ana kwamba amaywi aa yo iyeta ba patelo no Ndoo ya Nyambe abeebi ni ibaka omo kutewelwangwa enubu. Kono kakwisa omunu ona ku mununga, kakuli enako yaye kaya siku-keela kale.

Kamutwese Okuta Oko Nikatile

²¹ Jesu sebeli waambela kame nji, “Kame ni kutela, mi mba muni saele, mi mbamufele mu sibi senu. Oko nita, kamu twese okwiyako.”

²² Aendisi no Majuda sebeli akwibanguta nji, “Ninji kame sa kwibae yonyene kakuli kame aamba nji oko nita kamu twese okwiyako?”

²³ Jesu sebeli waambela nji, “Anyi kame mu tunda banji, mene kame ni tunda ku wilu. Anyi

kame muli asi litunga lino mene kasa nili wa litunga lino.

²⁴ Kame nina myambele nji kame sa mufele mu ibi yenu. Kakuli anyi mba mufele mu ibi yenu konji aba samu pumene ‘esi nili so’.”

²⁵ Sebeli amwibanguta nji, “Tiwe anyine?”

Jesu sebeli waatambula nji, “Kanyi aba nina myambele okutunda ku matatekelo.

²⁶ Kame nili neyi no kupula eyi no kwamba mulibaka lyenu neyi no kwatula, kono woyo ona nitumu niwa niti, mi kame nambela elitunga esi nina yupu okutunda kwa yonyene.”

²⁷ Kame ana ku kwangwa oku yupisisa nji kame ana kwamba noo eya Sitaye.

²⁸ Cwale Jesu sebeli wamba kwa onyene nji, “Aba sa mumane oku tuleka Omwana no munu, cwale basa mulimukele esi nili so, mi ka nitende esinjili menyene, kono kame naamba esi anani iyete Sitange.

²⁹ Cwale woyo ona nitumu kame ali ni mene. Yonyene kasi nisiya memboci, kakuli enako yonje kame nitenda eyi imu wabelisa.”

³⁰ Yo lemine okwamba eyo, ano kupula sebeli apumena mwa yonyene.

Eniti mbaimi Lukulula

³¹ Cwale Jesu sebeli wambela Amajuda awo ana kupumena mwa yonyene nji, “Nji kame mut-walelela mu liywi lyange, mba mu tende aiyetwa ange no niti,

³² mi mba mulimuka eniti, mane eniti mbaimi lukulula.”

³³ Sebeli amu tambula nji, “Aci kame tuli asi lusika lwa Abulahama, mi katusi tendiwa kale

abika ku munu. Iikene eso sikwambisa nji, ‘Mba mu lukululwa?’”

³⁴ Jesu sebeli waatambula nji, “Niti luli kame ni myambela nji omunu yonje woyo otenda esibi kame ali omubika ku sibi.

³⁵ Omubika katwalelele okwikala mu ndoo enako yonje, kono omwana kame aikalamo enako yonje.

³⁶ Cwale nji Omwana kame ami lukulula, mba mu tende asi kulukululwa luli.

³⁷ Kame ni yii nji aanyi olusika lwa Abulahama. Cwale kame musaela oku nibaa, kakuli eliywi lyange kame lyulwile esibaka mwaanyi.

³⁸ Kame namba esi nina mono kwa Sitange, mi anyi kame mu tenda esi mu nayupu kwa Sitenu.”

³⁹ Cwale sebeli amutambula nji, “Abulahama Sitetu.”

Jesu sebeli wamba kwa onyene nji, “Nji kame muli aana a Abulahama, kambe kame mu tenda emisebezi ana tende Abulahama.

⁴⁰ Kono bano kame mu saela oku nibaa, omunu ona myambele eniti nina yupu okutunda kwa Nyambe. Esi kasokame ana kutenda Abulahama.

⁴¹ Anyi kame mu tenda eso ana kutenda Sitenu.”

Sebeli aamba kwa yonyene nji, “Aci katusiku leyelwa mu unyazi Sitetu ni mumweya, yokame Nyambe.”

⁴² Jesu sebeli wamba kwa onyene nji, “Nji Nyambe neli Sitenu, kambe kame muni singa, kakuli kame ni simuluha ni kwiiya okutunda kwa Nyambe, kani siku kwiyela menyene, kono yokame ona ni tumu.

⁴³ Iikene aba kamwa yupisisa eyi ninaamba? Kakuli ka mupumene amaywi ange.

⁴⁴ Anyi kame mu tunda kwa sitenu Satani, mi kame mu singa okutenda etitakazo ta sitenu. Neli omwibai okutunda ku matangiseto, mi kakwisa eso atenda ni niti, kakuli kakwisa eniti mwa yonyene. Aba aonga, kame aamba esi ali so luli kakuli niwa mapwa mi sitaye amapwa.

⁴⁵ Kono kakuli kame ni myambela eniti, kamuni pumene.

⁴⁶ Anyine mwaanyi woyo soni monisa nji kame nili ni sibi? Nji kame ni myambela eniti, iikene aba kamwa nipumene?

⁴⁷ Woyo oli wa Nyambe kame amamela amaywi a Nyambe. Elibaka aba kamwa mamele ninji kamutendile aa a Nyambe.”

Jesu ni Abulahama

⁴⁸ Amajuda sebeli atambula Jesu nji, “Katwamba wino aba twamba nji kame oli Omusamaliya mi kame okwite edimona?”

⁴⁹ Jesu sebeli otambula nji, “Sikwite amadimona, kono kame nikuteka Sitange, mi anyi kamuni kuteke.

⁵⁰ Cwale kani saele ekanya yange, kwaali woyo oisaela mane kame satende omwatuli.

⁵¹ Niti luli kame ni myambela nji omunu kame ateula eliywi lyange, ka tamba okufa.”

⁵² Amajuda sebeli aamba kwa yonyene nji, “Cwale kame tu limuka nji kame uli ni madimona! Abulahama nafu kanyi omo ana tendele anuhi a Nyambe, mi wene kame wamba nji, Omunu aba ateula eliywi lyange katamba okufa.

⁵³ Kana kame onenebile okubitelela sitetu Abulahama woyo onafu? Mane na nuhi a Nyambe naafu. Wene kame oku beeka anyine?”

⁵⁴ Jesu sebeli waatambula nji, “Nji kame niku kanyisa menyene, ekanya yange ka ikwite tuso. Sitange yoni kanyisa, woyo mwamba nji Nyambe wenu.

⁵⁵ Kono kamwasi mulimuka mene ni muyii. Nji nambe nji kani muyii kame sani tende omoongi kanyi anyi, kono mene kame nimu limuka mane kame ni mamela eliywi lyaye.

⁵⁶ Sitenu Abulahama naku wabelelwa nji amone eliywaa lyange naku limona mane naku wabelelwa.”

⁵⁷ Cwale Amajuda sebeli aamba kwa yonyene nji, “Ka wasikwanisa kale emyaka makumi atanu, mi nu mono Abulahama?”

⁵⁸ Jesu sebeli wamba kwa onyene nji, “Niti luli kame ni myambela nji, Abulahama yokasiikalako kale, ‘Me niliko’.”

⁵⁹ Cwale sebeli atola amawee ni kumu konda, kono Jesu sebeli okushweeka, mane ni kutunda ba patelo no Ndoo ya Nyambe.

9

Jesu yo Balisa Omulume ona Kuleiwa yo Kamono.

¹ Jesu yobita, sebeli omona omulume ona kuleiwa yoka mono.

² Cwale aiyetwa aye sebeli amwibaguta nji, “Labbi, anyine ona tende esibi kana niyonyene nji ashemi aye, aba ana leiwa yoka mono?”

³ Jesu sebeli otambula nji, “Kasanji wuyu mulume kame ana tende esibi, simba ashemi aye. Kono ninji emisebezi ya Nyambe imonahalele mwa yonyene.

⁴ Kame tufanena okusebeza emisebezi ya woyo ona nitumu, abo kusili omunji, ousiku aba sowiye kakwisa omunu sotwesa okusebeza.

⁵ Kanyi aba nisili mu litunga, time eliseli no litunga.

⁶ Jesu aba ana kumana okwamba ngeeso, sebeli osibwela banji niku kanda endowa no mate awo, mi sebeli olamba ba miyo no mulume ni ndowa

⁷ ni kwamba kwa yonyene nji, “Ote oka kuyowe mu kasindi no Siloamu” (okutalusa nji kutumiwa). Cwale sebeli ota oka kuyowa ni kuukamo yo mona.

⁸ Aa ayoya naye nawo ana ku mu monanga yoli omukumbeli kunyima sebeli aamba nji, “Kana wuyu kasa yokame omulume ona kwikalanga mane yo kumbelanga?”

⁹ Anjili sebeli aamba nji, “Yo kame” Anjili nji, “Kokuulwa, kono kame akufekile kanyi yokame.” Yonyene sebeli wamba nji “Ya mene luli.”

¹⁰ Sebeli amwibanguta nji, “Cwale ngasibine kuna kutendahala nji amiyo owe afukuke?”

¹¹ Sebeli otambula nji, “Omulume wisaniwa Jesu kame ana ku kanda endowa ni kunokela mu miyo ange ni kwamba kwa mene nji ote ku kasindi no Siloamu, cwale sebeli nita nukakuyowa sebeli nimona.”

¹² Sebeli amwibanguta nji, “Okwaali yonyene?” Sebeli otambula nji, “Siyii.”

Afalisi aba ana Kusaisisisa oku Balisiwa oko

¹³ Cwale sebeli alita kwa Afalisi omulume no kwamona.

¹⁴ Cwale neli eliywaa no Pumulo abo Jesu ana kukanda endowa ni kuyatulula amiyo aye.

¹⁵ Afalisi sebeli amwibanguta kame omu ana kutendelwa njii amiyo aye amone. Cwale sebeli wamba kwa onyene njii, “Kame ana kubeeka endowa ba miyo ange nukuyowa mi sebeli ni mona.”

¹⁶ Cwale Afalisi anjili sebeli aamba njii, “Wuyu mulume katundu kwa Nyambe, kakuli kamamela Epumulo.” Kono anjili sebeli aamba njii, “Ngasibine omulume woyo oli osikutenda eibi njii atende etimakazo no ngeesi?” Kame kuna kwikala oukutaba mukaci koo.

¹⁷ Cwale kame sebeli aibanguta omulume no kwamona njii, “Iikene wamba mulibaka lyaye, okutunda abo ana kuyatulula amiyo owe?”

Omulume sebeli wamba njii, “Kame ali omunuhi wa Nyambe.”

¹⁸ Cwale aendisi no Majuda kasiku pumena njii omunu woyo kame ana ku leiwa yoli esibofu, mi nawana okumona kwaye, konjii aba ana kwisana ashemi no mulume ona kutwesa okumona

¹⁹ ni kwaibanguta njii, “Wuyu mwanenu? Woyo mwamba njii kame ana kuleiwa yoli esibofu, ngasibine kuna tendahala njii bano amone?”

²⁰ Ashemi aye sebeli atambula njii, “Mwanetu wuyu mi kame ana kuleiwa yoka mono.

²¹ Kono omo kunaiyele njii amone katuyii simba okulimuka woyo ona yatulula amoyo aye. Mu mwibangute, nakulu kame saambe yonyene!”

²² Ashemi aye kame ana kwamba ngeeso mu kucila aendisi no Majuda, kakuli Amajuda kame ana kupumena njii omunu aba sa pumene njii Jesu yokame Kilesite, kame sa kondelwe kundee no ndoo no milapelo.

²³ Cwale ashemi aye sebeli amba nji, “Mukulu, mu mwibangute!”

²⁴ Cwale aka no wiili sebeli aisana omulume ona kuleiwa yoka mono ni kwamba kwa yonyene nji, “Oyeeme Nyambe! Kame tuyii nji wuyu mulume ni osikutenda eibi.”

²⁵ Yonyene sebeli otambula nji, “Simba nji ni-natende esibi, siyii.” “Esinu simweya niyii ninji kame nina kutenda wuyu no kwamona, kono bano kame ni mona.”

²⁶ Sebeli amwibanguta nji, “Iikene ana kutenda kwa wene?” “Ngasibine ana kuyatulula amiyo owe?”

²⁷ Sebeli waatambula nji, “Kale aba nina myambe kono ka musi teeteta. Iikene aba musinga okuyupa kame? Kame musinga okutenda aiyetwa aye?”

²⁸ Cwale sebeli amu nyefula ni kwamba nji, “Tiwe omwiyetwa waye kono aci kame tuli aiyetwa a Mushe.

²⁹ Aci kame tuyii nji Nyambe kame ana kwamba kwa Mushe, kono kanyi ba wuyu mulume katu yii oko atunda!”

³⁰ Omulume sebeli waatambula nji, “Iikene esi kame sikomokisa! Kamutamba okulimuka oko atunda mi cwale nani yatulula amiyo ange!

³¹ Cwale kame tuyii nji Nyambe ka yupu asi kutenda eibi, kono nji omunu kame ali omulapeli wa Nyambe mane nikutenda eso asinga, Nyambe kame amuteeteta.

³² Asimba kwatanga okutunda ku matatekelo no litunga kaku siyupiwa kale omunu ona yatulula amiyo no munu ona kuleiwa yoka mono.

³³ Nji omunu wuyu kasi kutunda kwa Nyambe, kambe kakwisa esi ana twese okutenda.”

³⁴ Seli amutambula nji, “Wene kame oleyelwe mu sibi no kumanenena, cwale kame wamba nji mbu twiyete?” Mi sebeli amucitela kundee.

Oubofu no Mebo

³⁵ Jesu kame ana kuyupa nji namuciti, mi aba ana ku muwana sebeli wamba nji, “Kana kame opumena mwa Mwana no Munu?”

³⁶ Omulume sebeli otambula nji, “Mi anyine woyo, Mbumu, nji ni pumene mwa yonyene!”

³⁷ Jesu sebeli wamba kwa yonyene nji, “Nu mu-mono, mi yokame wuyu wamba kwa wene.”

³⁸ Omulume woyo sebeli wamba nji, “Kame ni pumena, Mbumu!” Mi sebeli omulapela.

³⁹ Cwale Jesu sebeli wamba nji, “Kakuli ekatulo nina iyele muno mu litunga nji cwale awo no kwa-mona afanene okumona mane nji awo amona aulwe okumona.”

⁴⁰ Anjili Afalisi ana kwikala ku nyonga ni yonyene aba ana yupa eyi, cwale sebeli amwibanguta nji, “Naaci kame tuli ano kwamona?”

⁴¹ Jesu sebeli wamba kwa onyene nji, “Nji kambe kame muli eibofu, kambe ka mu kwite ouyi no sibi, kono cwale kame mwamba nji kame tumona, ouyi wenu kwausili.”

10

Enguli no Mulisana no Mikoko

¹ Jesu sebeli waambela nji, “Niti luli kame ni myambela nji, woyo no kwaingena omulaka no mikoko okutusisa omwelo kono kame atina beulu

ni ku matukelamo okutusisa endila indina, woyo munu mbuyi ni sisinyi.

² Kono woyo oingena okutusisa omwelo yokame omulisana no mikoko.

³ Kwa yonyene omutateleli no mwelo kame au yatulula, mi emikoko kame iyupa eliywi lyaye, mane nikwisana emikoko yaye ni matina ni kwitwala kundee.

⁴ Cwale aba amana oku tundisa emikoko yaye yonje, kame aitwaletela mi emikoko kame imu koña, kakuli kame ilimukile eliywi lyaye.

⁵ Mundina kaitamba oku mukoña, kono kame sai cilele oku no kuleba ni yonyene, kakuli kaiyii eliywi no andina.”

⁶ Jesu sebeli waambela enguli eyi, kono kasikuyupisisa eso ana kwamba kwa onyene.

Jesu Omulisana no Kuwaba

⁷ Cwale Jesu sebeli wamba kwa onyene kame nji, “Niti luli kame ninyambela nji, Time omwelo no mikoko.

⁸ Awo onje aneyi oweli kwa mene ambuyi ni isinyi, kono emikoko kaisa yupa.

⁹ Time Omwelo. Nji omunu kame aingena okutusisa mene mba yoyisiwa, mane mba ingene ni kubanamo mi mba wana amauyiseto.

¹⁰ Ombuyi kame aiyanga feela mu kwiita, okwibaa ni kusinya. Mene kame nina iyele nji iwane omooyo, mane iuwane mu kupula.

¹¹ “Time omulisana no kuwaba. Omulisana no kuwaba kame aba emikoko yaye omooyo waye.

¹² Kono woyo oli omubeleki mi kasa mulisana, woyo oluwile emikoko no kwatenda eyaye, aba a mona ondiwi yoiya, kame asiya emikoko mi

kame acila mane ondiwi kame alema emikoko ni kwihasanya.

¹³ Omubeleki kame acila ngeeso, kakuli yonyene kame ali omubeleki feela mi kababalele emikoko.

¹⁴ Time omulisana no kuwaba, kame niyii emikoko yange mane emikoko yange kame iniyii.

¹⁵ Kanyi Sitange aba ani limukile, ni mene kame ni limukile Sitange, mi omooyo wange kame ni-uba emikoko yange.

¹⁶ Cwale kame nikwite emikoko injili eyo kasa ya mu mulaka uno. Kame ni fanena okwilita ngeeso, mi kame seiyupe eliywi lyange, cwale kame sakwikale omutapi mumweya ni mulisana mumweya.

¹⁷ Mulibaka eli Sitange yani singela, kakuli kame nikutoboha omooyo wange, nji ni uwane kame.

¹⁸ Kakwisa omunu woyo soushimba kwa mene. Kono kame nina kutoboha wo mukusinga kwange. Kame nili ni maata no ukutoboha wo mane ni kuushimba kame. Etaelo eyi kame nina itambula okutunda kwa Sitange.”

¹⁹ Kame kuna kwikala oukutaba kame mukaci no Majuda mulibaka no maywi aa.

²⁰ Ano kupula mwa onyene sebeli aamba nji, “Jesu kame akwite amadimona mane kame atakana, iikene aba muteeteta kwa yonyene?”

²¹ Kono anjili sebeli aamba nji, “Amaywi aa kasa omwambelo no munu woyo oli ni madimona. Kana edimona kame itwesa okuyatulula amiyo no sibofu?”

Jesu yo Kaniwa

²² Cwale neli omukiti no kakulo ku Jelusalema.

²³ Neli omubebo mi Jesu yo enda-enda ba patelo no Ndoo ya Nyambe, mu makozwana no mwelo wa Solomoni.

²⁴ Cwale Amajuda sebeli akuwana okumu beeka mukaci ni kwamba nji, “Kanakano ikuma babine eyo sotu teule mu kwayupisisa? Nji ya wene Kilesite otwambele wino eniti.”

²⁵ Jesu sebeli waatambula nji, “Na niku myambela, mi ka mwasi pumena. Emisebezi eyi ni tenda mu litina lya Sitange yokame eyi ini paka.

²⁶ Kono ka muni pumene, kakuli kamulamata ku mikoko yange.

²⁷ Emikoko yange kame iyupa eliywi lyange, mi kame ni ilimukile mane kame ini koña,

²⁸ kame niiba omooyo no kwaabwa, mi kaitamba okusinyeha, mane kakwisa omunu so itundisa mu lyoko lyange.

²⁹ Sitange ona kuniba yo, wa kuneneba okubitelela einu yonje, mi kakwisa omunu so twesa okwitundisa mu lyoko lya Sitange.

³⁰ Mene ni Sitange kame tuli bamweya.”

³¹ Amajuda sebeli atola amawee kame, nji amukonde oo.

³² Jesu sebeli waatambula nji, “Kame ninami monisa emisebezi no kuwaba eyi no kupula eyo itunda kwa Sitange. Ku yonyene emisebezi eyo ubine omusebezi ni ibaelwa?”

³³ Amajuda sebeli amutambula nji, “Katuku pwacaulele omusebezi no kuwaba, kono ni mu kunyefula, kakuli wene kame oli omunu mi kame okutenda nji tiwe Nyambe!”

³⁴ Jesu sebeli waatambula nji, “Kana kaya sikuñoliwa mu mulawo wenu?, Kame naamba nji, ‘Aanyi emilimu.’

³⁵ Nji kame ana isana nji milimi, kwanyine oko lina kwiiya eliywi lya Nyambe, (mi amañolo ka coliwa.)

³⁶ Kame mwamba ya yonyene woyo ona sepiwa kwa Sitange ni kumu tuma mu litunga. Kame mu nyefula kakuli kame nina aamba nji time Omwana Nyambe?

³⁷ Nji kani tende emisebezi ya Sitange, cwale mulese oku nipumena.

³⁸ Kono nji kame niitenda, simba nji anyi kamuni pumene, mupumene amaywi awo mufanena oku limuka niku yupisisa nji Sitange kame ali mwa mene mane ni mene mwa Sitange.

³⁹ Kame sebeli aeteka okununga Jesu, kono sebeli obanduka mu maoko oo.

⁴⁰ Jesu sebeli ota kame oka luta okuta mu linjaliya lya Jodani ku sibaka eso ana kwikala Jowani ba weli yo kolobeza mi omo sebeli oka ikalamo.

⁴¹ Cwale ano kupula sebeli aiya kwa yonyene ni kwamba nji, “Jowani kasiku tenda emakazo.” “Kono einu yonje eyo Jowani anaamba okukumana ni wuyu mulume neli ya niti.”

⁴² Cwale ano kupula sebeli apumena mwa Jesu.

11

Elifu lya Lazalo

¹ Cwale kame kuna kwikala omulume munjili neli omweti ona kwisanwa Lazalo no Beteni, omundi wa Maliya ni mukulwaye Maleta.

² Maliya yokame ona kushokona Ombumu amati no sende, ni kumu kuumuna amakondo aye ni tiñuki taye, Lazalo ona ku toma neli mandaye.

³ Cwale amandaye sebeli atuma aanu kwa Jesu okaamba nji, “Mbumu, omusingiwa wowe kame atomine.”

⁴ Kono Jesu aba ana kuyupa ngeeso sebeli wamba nji, “Ou weeti kasa wa kufa, kono ni wa kuyeema Nyambe, nji cwale Omwana Nyambe ayemiwe mu libaka lyawo.”

⁵ Jesu kame ana kusinga Maleta ni minaye ni Lazalo.

⁶ Cwale aba ana kuyupa nji Lazalo neli omweti, sebeli oekeza okwikala amaywaa ayiili kame mu sibaka omo ana kwikala.

⁷ Munyima no eyo Jesu sebeli wamba kwa iyetwa aye nji, “Twendeni kame mu Judeya.”

⁸ Aiyetwa sebeli aamba kwa yonyene nji, “Labbi, Amajuda kame ana kusinga okukukonda amawee, cwale kosinga okuta kuya kame?”

⁹ Jesu sebeli otambula nji, “Kasanji kame kuli etihola likumi ni timbili mu liywaa? Nji omunu kame aenda omunji kasisitala, kakuli kame amona eliseli no litunga lino.

¹⁰ Kono omunu aba aenda ousiku kame asitatala, kakuli eliseli ka lisako kwa yonyene.”

¹¹ Aba ana mana okwamba eyo ni kwaambela nji, “Lazalo omulikani wetu nalangana, kono nisita nika mwingule.”

¹² Aiyetwa sebeli atambula nji, “Mbumu, nji nalangana, mbaikala wino.”

¹³ Cwale Jesu kame ana kwamba olufu lwaye, kono onyene kame ana ku yambuta nji kame aamba otulo feela.

¹⁴ Cwale Jesu sebeli waataluseta wino nji, “Lazalo nafu,

¹⁵ mi mulibaka lyenu kame ni wabelelwa aba nina kuulwako, nji mu pumene. Kono cwale twendeni kwa yonyene.”

¹⁶ Tomasi ona kwisaniwa Mbile sebeli wamba kwa iyetwa nji, “Twendeni naaci, tu kafe naye.”

Jesu Okwinguka mane yo Mooyo

¹⁷ Cwale Jesu aba ana kukeela kame ana kuwana nji Lazalo sebeli okwite amaywaa anee yo teulilwe mu liyumbelo.

¹⁸ Cwale Betaniya neli beebi ni Jelusalema omwendo ofanena eibima yiili,

¹⁹ mi Amajuda no kupula kame ana kwiiya kwa Maleta ni Maliya, muku silisa mulibaka no lifu lya mandoo.

²⁰ Cwale Maleta aba ana kuyupa nji Jesu kame akeile, sebeli ota nukuwana naye, abo Maliya yoikalile mu ndoo.

²¹ Maleta sebeli waambela Jesu nji, “Mbumu, kambe na ukwikalako, kambe mandange ka sifa!

²² Cwale simba bano niyii nji esi sonje so kumbele kwa Nyambe, Nyambe mba kubiso.”

²³ Jesu sebeli wamba kwa yonyene nji, “Mandowe mba inguka kame.”

²⁴ Maleta sebeli wamba kwa yonyene nji, Nilimukile nji mba inguka kame mu nako no kwinguka ba liywaa no mamananeno.

²⁵ Jesu sebeli omwambela nji, “Time omooyo ni kwinguka. Woyo opumena mwa mene, simba afe mba yoyo,

²⁶ mi omunu yonje woyo oyoya mane ni kupumena mwa mene, katamba okufa luli. Kana kame opumena ngeeso?”

²⁷ Maleta sebeli otambula nji, “Ee Mbumu, kame nipumena nji ya wene Kilesite omwana Nyambe, oneyi mu litunga.”

Jesu yo Lila

²⁸ Aba ana kumana okwamba eyo, sebeli ouka oka isana minaye Maliya yo aamba mukondoka nji, “Omwiyeti kwaali bano, mi kame akwisana.”

²⁹ Cwale Maliya osi yupa ngeeso, sebeli oimana wangu ni kuta kwa Jesu.

³⁰ Cwale Jesu yokasi ingena kale mu mundi, kono yosili abo Maleta ana ku muwaniketela.

³¹ Cwale Amajuda awo ana kwikala ni Maliya mu ndoo a mongota, aba ana kumona nji kame ana leluba okwimana ni kubanena bandee, sebeli amukoña. Kame ana ku yambuta nji kame ata ku liyumbelo oka lila.

³² Cwale Maliya aba ana kukeela oko Jesu ana kwikala, osimu mona feela, sebeli okwela ba makondo aye, yo aamba kwa yonyene nji, “Mbumu, kambe kona kwikala, kambe mandange ka sikufa!”

³³ Cwale Jesu aba ana kumumona yo lila, ni Majuda amukoñelele alemine okulila no nyene, sebeli oyaiwa mu mebo ni kosisimuka.

³⁴ Jesu sebeli oibanguta nji, “Kubine muna mubeeke?” Seli aamba kwa yonyene nji, “Molyetu, wiiye omone.”

³⁵ Cwale Jesu sebeli olila.

³⁶ Cwale Amajuda sebeli aamba nji, “Komu-mone omo anaku musingela!”

³⁷ Kono anjili sebeli aamba nji, “Yokame wuyu ona kuyatulula amiyo no sibofu no mulume, iikene kasi teula wuyu mulume nji alese okufa?”

Lazalo abana Inguliwa Kwaafu

³⁸ Jesu sebeli oyaiwa kame mu mebo, mi sebeli ota ku libita, neli owina ona kuyatiliwa ni liwee.

³⁹ Jesu sebeli wamba nji, “Mu tundise eliwee!” Maleta omandaa no mulume onafu, sebeli wamba kwa Jesu nji, “Mbumu, ba nako ino sebeli onuka, kakuli sebeli amaywaa anee yofile!”

⁴⁰ Jesu sebeli wamba kwa yonyene nji, “Ka nisi kwambela nji aba opumena, mbu mono ekanya ya Nyambe?”

⁴¹ Cwale sebeli atundisa eliwee. Jesu sebeli waliketa amiyo aye ku wilu ni kwamba nji, “Sitange, kame ni kutumela mwa wene, kakuli nuni yupu.

⁴² Kame niyii nji kame oni yupa enako yonje, kono kame naamba ngeeso mulibaka no aanu no kupula aa ana nibeke mukaci, nji apumene nji nuni tumu.”

⁴³ Jesu aba ana kumana okwamba ngeeso, sebeli okuwa ni liywi linene nji, “Lazalo, otunde mu liyumbelo!”

⁴⁴ Omulume ona kufa sebeli obanamo, yo tingetilwe ku makondo ni ku maoko olwambi, mi olubala lwaye olu fukilwe ependeka. Jesu sebeli

wamba kwa onyene nji, “Mu munungutule, mi mumu lesele akwendele.”

Omulelo no Kwibaa Jesu

(Mateu26.1-5; Maleka14.1-2; Luka22.1-2)

⁴⁵ Cwalehe Amajuda no kupula awo ana kwiiya ni Maliya mi sebeli amona eyo ana tende Jesu, sebeli apumena mwa yonyene.

⁴⁶ Kono anjili kwa onyene, sebeli ata kwa Afalisi mu kwaambela esi ana tende Jesu.

⁴⁷ Cwale apulisita akulu na Falisi sebeli awaneka aendisi no Keleke ni kwamba nji, “Iikene satutende? Kakuli wuyu mulume kame atenda etimakazo no kupula.

⁴⁸ Nji tu muleselele yo tenda ngeeso, aanu onje kame sa pumene mwa yonyene, mi Amaloma kame saiye mu kushandola esibaka setu no kukena ni sicaba setu.”

⁴⁹ Kono omunjili kwa onyene, Kayafa, omupulisita mukulu mu mwaka owo, sebeli wamba kwa onyene nji, Kakwisa esi mulimukile!

⁵⁰ Ka muyupisisa nji kwakuwaba omunu mumweya aba afela aanu, nji cwale esicaba sonje silesele okusinyeha?

⁵¹ Ka sikwamba feela mukusinga kwaye, kono bakutenda nji neli omupulisita mukulu mu mwaka owo, kame ana kunuha nji Jesu kame sa fele esicaba,

⁵² mi kasa esicaba feela, kono bamweya naana a Nyambe awo ana hasana.

⁵³ Cwale okutunda ba liywaa elyo, sebeli alela nji a mwibae.

⁵⁴ Jesu sebeli olesela okuta yoku monahaza mukaci no Majuda, kono sebeli otundamo

oukutela mu naha ina kwikala ku nyonga ni lihalaupa, mu tolopo isaniwa ni Efalaimu, mi sebeli oikalamo na iyetwa aye.

⁵⁵ Cwale omukiti no Paseka no Majuda oli beebi, mi ano kupula sebeli atunda mu naha okuta ku Jelusalema okutangeta omukiti no Paseka owakasi tendahala kale ni aka kukenise.

⁵⁶ Kame ana kusaelanga Jesu akwambisa omunjili ku munjili aimanine mu patelo no Ndoo ya Nyambe ni, “Kame mu yambuta ngasibine? Ninji katamba okwiya ku mukiti?”

⁵⁷ Cwale apulisita akulu na Falisi sebeli alaela ni omunu olimukile omo ali Jesu, kame afanena okwasimweta, ni cwale amununge.

12

Maliya yo Waa Jesu Amaati mu Beteni (Mateu26.6-13; Maleka14.3-9)

¹ Aba kuna kusiyala amaywaa atanu ni kamweya ni Epaseka itendiwe, Jesu sebeli wiya ku Beteni, omo ana kwikala Lazalo woyo ona kwingulwa kwaafu.

² Omo sebeli otendelwa omulalelo, Maleta yo sikutaba eilya, mi Lazalo neli mumweya kwa sikulya naye ku tafule.

³ Maliya sebeli oshimba amaati no sende awo ali elicika mu katele, mane ni kuwaa amakondo a Jesu. Mi sebeli watundisa ni tiñuki taye. Mi endoo yonje mane sebeli iiyala ni mumwee no maati.

⁴ Kono Judasi Isikaliota omunjili no aiyetwa aye woyo so mubeteka, sebeli wamba ni,

⁵ “Iikene esende eyo aba ka isiulisiwa emyanda yaatu no muwayawaya, (300) mi amali awo atabelwe awo ashebile?”

⁶ Kame ana kwamba ngeeso, kasa nji kame ana ku tokomela awo ashebile, kono mulibaka no kutenda nji neli mbuyi yokame ona ku teulanga esikwama no mali, mi kame ano ku shimbelanga eyo ina ku bekiwangwa mo.

⁷ Kono Jesu sebeli wamba nji, “Mu mulesele yomboci, mu mulesele aateule konji ba liywaa no kepele yange.

⁸ Kakuli awo ashebile kame muli noo enako yonje. Kono ka mutamba okwikala ni mene enako yonje.”

⁹ Amajuda no kupula aba ana kuyupa nji Jesu mwaali omo mi sebeli aiya, mi kasa mulibaka lya Jesu feela, kono ni mu kumona Lazalo ona kwingulwa kwaafu.

¹⁰ Apulisita akulu sebeli alela okwibaa ni Lazalo,

¹¹ kakuli Amajuda no kupula kame ana kwa siya mulibaka lya Lazalo, mi sebeli apumena mwa Jesu.

Jesu yo Ingena mu Jelusalema mu Umbumu.

(Mateu21.1-11; Maleka11.1-11; Luka19.28-40)

¹² Aba kuna kupa okupula no ku neneba no aanu aa ana kwiiya ku mukiti, aba ana yupa nji Jesu kame aiya mu Jelusalema, sebeli ashimba emitayi no tinzalu.

¹³ Cwale sebeli ashimba emitayi no itondo no tinzalu ni kuta okamu waniketa akuweleza nji, “Hosana! Embuyoti ya woyo wiiya mu litina lya Mbumu, Ombumu no Isilaele!”

¹⁴ Mi Jesu sebeli owana akana no mbongolo, sebeli oikala beulu wako kanyi aba kuñolilwe nji,

¹⁵ “Olese kucila, wene Omwana Sione no mukatana!

Komone, ombumu wowe okeyile,

yo ikalile beulu no kana no mbongolo.”

¹⁶ Aiyetwa aye kasi kuyupisisa eyo ba weli, kono Jesu aba ana kumana okukanyisiwa, cwale sebeli apuluka nji eyi kame ina kuñoliwa eyaye mane namutendele yo.

¹⁷ Mi oundi no aanu awo ana kwikala naye aba ana kwisana Lazalo okutunda mu liyumbelo, mi sebeli omwingula kwaafu, kame ana ku mupaka.

¹⁸ Mi elibaka elyo oundi no aanu aba ana kuta okamuwaniketa, neli nji kame ana kuyupa nji kame anatende emakazo.

¹⁹ Afalisi sebeli akwambisa omunjili ku munjili nji, “Mu mone nji ka mutwese okutenda esinjili. Komumone, elitunga lyonje na limukoño!”

Amagelike anjili Asaela Jesu

²⁰ Cwale kame kuna kwikala Amagelike anjili kwaa ana kwiiya mu kulapela ku mukiti.

²¹ Seli aiya kwa Filipi na ku Betasaida na mu Galileya, mi sebeli amu kumbela nji, “Molyetu, kame tu singa oku mona Jesu.”

²² Filipi sebeli ota nuka ambela Andiliyasi mi cwale Andiliyasi ni Filipi sebeli akambela Jesu.

²³ Jesu kame ana kwatambula nji, “Enako naiyi eyo Omwana no munu eyi sa kanyisiwe.

²⁴ Niti luli kame ni myambela nji, embuto no uloto eyi ikunwa mu mumbu aba yulwa okufa,

mba ikala yomboci, kono aba ifa, mba iliti eilya no kupula.

²⁵ Woyo osinga omoyo waye, mba utaukelwe, kono woyo otimbile omoyo waye mu litunga lino, mba tewelwa omoyo no kwaabwa.

²⁶ Omunu aba ani sebeleza ani koñe, mi omu nili, woyo oni sebeleza mba ikala mo ni yonyene mi omunu aba ani sebeleza, Sitange mba mukuteke.

Jesu yo Aamba Eyi no Lifu lyaye

²⁷ “Cwale Omoyo wange kame ukalelwe mi iikene sa naambe? ‘Sitange onisileleze mu nako eyi’? Kokuulwa mulibaka eli kame ineyi ba hola ino.

²⁸ Sitange okanyise elitina lyowe!” Cwale eliywi sebeli litunda ku wilu eli lyaamba nji, “Kame ninalikanyisa mi mbani likanyisa kame.”

²⁹ Cwale oundi no aanu ona kwimananga sebeli oyupa eliywi ni kwamba nji nalilumu, anjili sebeli aamba nji, “Elingeloi na lyamba kwa yonyene!”

³⁰ Jesu sebeli otambula nji, “Eliywi elyo kame lineyi mulibaka lyenu, kasa mulibaka lyange.

³¹ Cwale ino ni katulo no litunga lino, cwale ombumu no litunga lino mba citelwe kundee.

³² Cwale mene aba sani none okutunda ba litunga mba niliti aanu onje kwa mene.”

³³ Kame ana kwamba ngeso oku monisa elifu elyo safe.

³⁴ Ano kupula sebeli atambula nji, “Kame tuna iyetwa ku mulawo nji Kilesite mba ikala enako yonje. Ngasibine aba wamba nji omwana no munu mba noniwa okutunda ba litunga? Anyine Omwana no Munu?”

³⁵ Jesu sebeli wamba kwa onyene nji, Eliseli kwa li sili mwaanyi enako icana fela. Mweende aba mu sili ni liseli, nji ouwi olese oku milema, kakuli woyo weenda mu uwi ka limukile oko ata.

³⁶ Aba mu sili ni liseli, mu pumene mu liseli, nji mu futuke aana no liseli.

Okwa Pumena no Aanu

Jesu osi mana okwamba ngeso, sebeli okutela mi sebeli okushweeka kwa onyene.

³⁷ Simba nji kame ana kutenda etimakazo no kupula ngeso balubala loo, kono aendisi no Majuda kasi kupumena mwa yonyene.

³⁸ Esi neli okwiyateteta amaywi ana kwambiwa kwa munuhi Isaya, eli lyaamba nji,
“Mbumu, anyine ona pumene etaba yetu?

 Mi kwanyine oko ku monahalisa elyoko lya
 Mbumu?”

³⁹ Cwalehe kame ana ku kwangwa okupumena, kakuli Isaya na kwamba kame nji,

⁴⁰ “Nyambe kame ana fofalisa amiyo oo
 mi kame ana tatafalisa emicima yoo,
nji alese okumona ni miyo oo,
 alese okuyupa ni micima yoo,
 alese oku siulukela kwa mene,
 nji nabalisa.”

⁴¹ Isaya kame ana kwamba eyo kakuli kame ana kumona ekanya yaye, mane sebeli wamba eya Jesu.

⁴² Simba aba kulingeso, aa no kupula kwa endisi no Majuda anjili kame ana pumene kwa yonyene, kono kasiku kutoya, mu kucila Afalisi nji alese oku citelwa ku ndee no ndoo no milapelo.

⁴³ Kakuli kame ana kusinga oku bubekwa kwaanu, okubita oku bubekwa kwa Nyambe.

⁴⁴ Jesu sebeli okuweleza nji, “Woyo opumena mwa mene, ka pumene mwa mene, kono kame apumena mwa woyo ona ni tumu.

⁴⁵ Mi woyo oni mona, kame amona ni woyo ona ni tumu.

⁴⁶ Kame ni neyi mu litunga kanyi eliseli nji woyo yonje opumena mwa mene alese okwikala muuwi.

⁴⁷ Nji omunu kame ayupa amaywi ange, mi yo ulwa okwa teula, mene kani mwatula, kakuli ka ni siiya mu kwatula elitunga, kono nji ni yoyise elitunga.

⁴⁸ Woyo oni kana mi yo ka tambula amaywi ange, kame akwite woyo so mu atula, Eliywi ni-naamba lyokame elyosa limwatule mu liywaa no mamananeno!

⁴⁹ Kakuli ka ni kwambele mu maata ange feela, kono Sitange woyo ona ni tumu, yokame ona laele esi ni fanena okwamba, ni mukwa owo naamba nawo.

⁵⁰ Mi kame ni yii nji etaelo yaye ni moyo no kwaabwa. Mi cwale esi naamba, kame ni saamba kanyi Sitange aba ana nambele so.”

13

Jesu yo Yowisa Eilyatiso no Aiyetwa aye

¹ Cwale omukiti no Paseka waka sikeela kale, Jesu naku limuka nji enako yaye no kutunda mu litunga okuta kwa sitaye naikwana mukusinga aye awo ana kwikalanga mu litunga, sebeli wasinga okutwala ku mamananeno.

² Cwale enako no kulya omulalelo aba ina kukwana, abo cwale Odiabulozi yo waingena kale mumucima wa Judasi Isikaliota, omwana Simoni, oku mubeteka.

³ Jesu mu kulimuka nji Sitaye kame ana kubeeka einu yonje mu maoko aye, ni nji kame ana kutunda kwa Nyambe, mi kame auka kwa Nyambe.

⁴ Seli oimana ba mulalelo ni kutubula esikumango saye nabeulu, mane nuku nunga olwambi mu mbunda.

⁵ Seli oitela ameyi ba siwana, mi sebeli otangisa oku yowisa eilyatiso no aiyetwa aye, ni kwa kumuna ni taulo eyi ano kununga mu mbunda.

⁶ Seli oiya ngeso nikwa Simoni Pitolosi, mi cwale Pitolosi sebeli wamba kwa yonyene nji, “Mbumu, kame oyowisa eilyatiso yange nji?”

⁷ Jesu sebeli omutambula nji, Esi ni tenda ka usilimukile bano, kono mbu si yupisisa ku lubala.

⁸ Pitolosi sebeli wamba kwa yonyene nji, Ku tamba ku ni yowisa eilyatiso yange. Jesu sebeli omutambula nji sikuyowisa kukwite ekabelo ni mene.

⁹ Simoni Pitolosi sebeli wamba kwa yonyene nji, “Mbumu! kasa eilyatiso yange feela, kono ni maoko ange mane ni mutwi.”

¹⁰ Jesu sebeli wamba kwa yonyene nji, “Woyo yonje ona ku yowo, kasaele okuyowa konji kuilyatiso, olutu lwaye lusikenine lonje. Mi anyi kame mu kenine, kono kasa aanyi moonje.”

¹¹ Kakuli kame ana kulimuka woyo so mu beteka. Ni mulibakelyo aba ana kwamba nji, “Ka mu kenine moonje.”

¹² Aba ana kumana okwa yowisa kwilyatiso, sebeli okumanga esikumango saye nabeulu, sebeli oikala ba tafule kame, mi sebeli wamba kwa onyene nji, “Kana kame mu yupisisa esi nina mitende?”

¹³ Kame mu ni isana nji Mwiyeti ni Mbumu, mi kame mwamba wino, kakuli ya meene.

¹⁴ Mi cwale nji mene ombumu ni mwiyeti wenu inayowisa eilyatiso yenu, naanyi kame mu fanena ouku yowisa kwilyatiso.

¹⁵ Kakuli kame nina mimonisa omwanda nji mutende omu nina mitendele.

¹⁶ Niti luli kame ni myambela nji, omubika ka biti Ombumu waye, mi woyo ona tumiwa ka biti woyo ona mutumu.

¹⁷ Nji kame mulimuka einu eyi, namufuyaulwa nji kame muitenda.

¹⁸ “Kanaamba anyi moonje, nilimukile aa ninakete, kono eliñolo kame saliiyatetetwe nji, ‘Woyo ona kulya esinkwa sange nanifutukele.’

¹⁹ Kame ni myambela etaba eyi bano abo yakasiiya kale, nji aba saitendahale mupumene nji yameene.

²⁰ Niti luli kame ni myambela nji, woyo otambula omunu yonje nituma, kame ana tambula mene, mi woyo otambula mene, kame atambula woyo ona nitumu.”

Jesu yo aamba eyi no Kubetekiwa kwaye
(Mateu26.20-25; Maleka14.17-21; Luka22.21-23)

²¹ Cwale Jesu aba ana kumana okwamba ngeso, sebeli oshupeka mu mucima ni kwambela

aiyetwa aye nji, “Niti luli kame ni myambela nji, omunjili mwaanyi kame sani beteke.”

²² Cwale aiyetwa sebeli akwaliketa, abo kalimukile woyo aamba.

²³ Omunjili kwa iyetwa aye Jowani, woyo ona ku singiwa kwa Jesu yo shendamine ba saali saye.

²⁴ Simoni Pitulosi sebeli omu kobeta nji, “Otwibangutele woyo aamba.”

²⁵ Cwale yonyene sebeli oshendamena ba Saali sa Jesu, sebeli oibanguta nji, Mbumu anyine cwale?

²⁶ Jesu sebeli otambula nji, “Woyo sani be esinkwa esi sina cupwiwa mu siwana.” Mi aba ana kumana okusi cupwa, sebeli osiba Judasi omwana Simoni Isikalyoti.

²⁷ Aba ana kumana oku tambula esinkwa, Sani sebeli oingena mu mucima wa Judasi. Cwale Jesu sebeli wamba kwa yonyene nji, “Esi osinga okutenda, ositende wangu.”

²⁸ Cwale kakwisa simba mumweya ba tafule woyo ona kulimuka elibaka anambeke ngeso kwa yonyene.

²⁹ Anjili kame ana ku yambuta nji, Judasi aba ana kutenda nji yo kame osikuteula esikwama, Jesu kame ana ku mwambela nji, akaule esi tusaela ba mukiti simba nji akabe aa ashebile esinjili.

³⁰ Yonyene aba ana kumana okushimba esinkwa, ababo sebeli otundamo. Mi neli usiku.

Etaelo no Ubya

³¹ Judasi aba ana kumana oku bana, Jesu sebeli wamba nji, “Cwale Omwana no munu na kanyisiwa, mi mwa yonyene, Nyambe na kanyisiwa.

³² Nji Nyambe na kanyisiwa mwa yonyene, Nyambe kame mba kamu kanyisa mwa yonyene, mi mba mu kanyisa ababo.

³³ Anange, mbaniikala naanyi ba nako inyonyo feela. Mba muni saele, mi kanyi omo nina kwambela kwa aendisi no Majuda, kame ni myambela naanyi ngeso, ‘Okoko nikatile ka mutwese kuni koña.’

³⁴ Kame ni miba omulawo no ubya, ninji muku singe kanyi omu nina misingele, naanyi muku singe ngeso.

³⁵ Mweesi aanu onje mbalimuka nji muli aiyetwa ange, nji kame mukusinga omunjili ku munjili.

Jesu yo Aamba Eyi no Kukana kwa Pitulosi

³⁶ Simoni Pitulosi sebeli wamba kwa yonyene nji, “Mbumu, kubine okatile?”

Jesu sebeli omu tambula nji, “Okoko nikatile ka mutwese okunikoña cwale, kono munyima mba muni koña.”

³⁷ Pitulosi sebeli wamba nji, “Mbumu iikene abo kani kukoña abano? Mene kame sanife ni wene!”

³⁸ Jesu sebeli omu tambula nji, “Kana kame otwesa okutoboha omoyo wowe kwa mene? Niti luli kame ni kwambela nji, Omukombwe owa kasilila kale, kame sonilatule twaatu.”

14

Jesu Endila ita kwa Sitetu

¹ “Mulese okubilaela mu micima yenu, mupumene mwa Nyambe mane mupumene ni mwa mene ngeso.

² Mu ndoo ya Sitange emizuzu ni yakupula, kambe kasa ngeso kambe kanisi myambela ngeso nji kame nikatile oka milukiseta esibaka.

³ Cwale aba nita oka milukiseta esibaka, mbani uku kame mukumishimbela kwa mene nji mukaikale nange oko nili.

⁴ Kame mulimuka endila ita ku sibaka oko nita.”

⁵ Tomasi sebeli wamba kwa Jesu nji, “Mbumu, katuyii oko ukatile, cwale ngasibine satu limuke endila itako?”

⁶ Jesu sebeli wamba kwa yonyene nji, “Time endila, ni niti, mane ni moyo, kakwisa omunu sota kwa Sitange konji mwa mene.

⁷ Nji namuku nilimuka, kambe namu limuka ngeso ni Sitange, okutunda bano namu mulimuka mane namumu mono.”

⁸ Filipi sebeli wamba kwa Jesu nji, “Mbumu, otumonise Sitetu, mi mba tukolwa.”

⁹ Jesu sebeli omwambela nji, “Kame nina ikala naanyi enako no kuleba, mi kausi nilimuka Filipi? Woyo ona nimono kame ana mono ni Sitange. Ngasibine aba wamba nji, ‘Otu monise Sitetu’?”

¹⁰ Kaupumene nji kame nili mwa Sitange mane ni Sitange kame ali mwa mene? Amaywi awo naamba kwa wene kani myambele oo mu maata ange, kono Sitange woyo oli mwa mene yokame woyo otenda emisebezi yaye.

¹¹ Mu nipumene nji kame nili mwa Sitange mane Sitange kame ali mwa mene. Nji kasangeso mu nipumene mulibaka no misebezi eyo.

¹² Niti luli kame ni myambela nji, “Woyo opumena mwa mene mbatende emisebezi nitenda mane kame sa tende minene niku bitelela, kakuli kame nita kwa Sitange.”

¹³ Eyo yonje okumbela mu litina lyange, kame sani itende nji Sitange akanyisiwe mwa Mwana.

¹⁴ Nji kame mukumbela esinjili mu litina lyange, mba nisi tende.

Esepio no Mebo No Kukena

¹⁵ “Nji kame muni singa, mu mamele etitaelo tange.

¹⁶ Cwale mba nilapele Sitange, mi mba mibi omuombaombi omunjili, nji aikale naanyi okuta oku no kwaabwa.

¹⁷ Simba Emebo no niti, eyo elitunga ka litwese okwitambula simba okwilimuka kakuli kali imwine, mi kali ilimuka. Kono anyi kame mu muyii, kakuli kame ali naanyi mane mba ikala kwaanyi.

¹⁸ “Kani tamba ku misiya memuli andiyala, mba ni uku kwaanyi.

¹⁹ Kusili enakoicana mi elitunga kali tamba oku ni mona kame, kono anyi mbamu nimono. Kakuli mene kame ni yoya, naanyi mba muyoyo.

²⁰ Mu liywaa elyo, mba mu limuka nji kame nili mwa Sitange, naanyi kame muli mwa mene mane ni mene mwaanyi.

²¹ “Woyo oli ni titaelo tange mane nikutiteula, yokame woyo oni singa. Mi woyo oni singa, mba singiwa kwa Sitange ni mene mba nimu singi mane niku monahaze kwa yonyene.”

²² Judasi (kasa Isikalioti) sebeli wamba nji, “Mbumu, ngasibine wamba nji mbu kumonahaza kwaaci, mi kasa ku litunga?”

²³ Jesu sebeli omutambuta nji, “Omunu aba ani singa, mba mamele eliywi lyange. Mi Sitange

mbamu singi, mi mbatwiyi kwa yonyene mane tuyake omundi wetu ni yonyene.”

²⁴ Woyo no kwani singa ka teula amaywi ange mi eliywi muyupa kasa lyange kono lya Sitange ona nitumu.

²⁵ Einu eyi kame nina myambeke yo aba ni sili nenu.

²⁶ Kono Omombaombi, Emebo No Kukena eyo Sitange mba itumu mu litina lyange, mba imiiyete einu yonge mane mbaimi pulukisa einu yonje eyo nina myambeke.

²⁷ Kame nimi siyela ekozo, ekozo yange nimiba, kaikufeka ni omo limibelanga elitunga, omo nimibela. Emicima yenu ilese okukatazaha simba okucila.

²⁸ Na mukuyupa eyi nina myambeke nji, ‘Kame nita, mi mba niiyi kwaanyi.’ Kambe namukunisinga, kambe mbamu wabelelwe kakuli kame nita kwa Sitange, kakuli Sitange wa kuneneba okubita mene.

²⁹ Cwale kame nina myambeke eyo ekaya sitendahala, nji aba imana okwiiya, mu pumene.

³⁰ Sitamba okwamba eino kupula naanyi, kakuli omubusisi no litunga lino okeyile. Ka kwite amaata beulu yange,

³¹ kono kame nitenda kanyi Sitange omo anani laelele, nji cwale elitunga lilimuke nji kame ni singa Sitange.

Ko mwimane, twendenyi abano.

15

Jesu Ebeine no Luli

¹ Time ebeine no niti, mi osi kulima ni Sitange.

² Omutayi onje uli kwa mene nokwa beeka embuya, kame au temako mi omutayi onje ou ubeeka embuya, kame au kolela nji obeeke onene embuya.

³ Anyi namu kenisiwa mulibaka no liywi nina myambele kale.

⁴ Mwikale mwa mene, kanyi mene aba nili mwaanyi. Kanyi omutayi aba kautwese okubeeka embuya wonyene, konji aba okubeeka mu beine, kame kuli ngeso ni kwaanyi, konji aba samukubeeke mwa mene.

⁵ Time ebeine, anyi kame muli emitayi. Woyo okubeeka mwa mene, ni mene kame nili mwa yonyene, yokame woyo obeeke embuya onene, kakuli nji sisako ka mutwese okutenda esinjili.

⁶ Nji omunu kakubeeke mwa mene, kame akoliwa kanyi omutayi ni kukukuta, mi emitayi kame yungekiwa ni kukondelwa mu mulilo mane ni kubya.

⁷ Nji kame mukubekile mwa mene mane amaywi ange kame ali mwaanyi, mukumbele eso sonje musinga mi mbamu sitendelwe.

⁸ Ba kutenda ngeso Sitange mba kanyisiwa nji kame mubeeka onene embuya, mi bokame aba samutende aiyetwa ange.

⁹ Kanyi Sitange aba ana nisingi ni mene kame nimi singa ngeso, mu yoye mu lilato lyange.

¹⁰ Nji kame muteula etitaelo tange, kame sa mwikale mu lilato lyange, kanyi aba nina mamele etitaelo ta Sitange mane kame niikalile mu lilato lyaye.

¹¹ Kame nina myambele eyo nji okuwabelelwa kwange kwikale mwaanyi nji cwale

okuwabelelwa kwenu kwiyale.

¹² Etaelo yange ninji muku singe omunjili ku munjili, kanyi aba nina misingi.

¹³ Kakwisa omunu woyo oli ni lilato no kuneneba okubitelela eli, konji omunu okutoboha omoyo waye mulibaka no alikani aye.

¹⁴ Kame muli alikani ange nji kame mutenda eyo nimi laelela.

¹⁵ Sitamba oku miisana nji muli abika, kakuli omubika ka limuka eso atenda Molyaye. Kono kame nimiisana alikani ange, kakuli kame nina misimwete eyi nina yupu yonje kwa Sitange.

¹⁶ Kasa anyi muna nikete, kono time nina mikete ni kumi tuma nji mute mane muka beeke embuya onene. Cwale embuya yenu iikalelele, nji cwale esi sonje samu kumbele kwa Sitange mu litina lyange amibe so.

¹⁷ Esi nimi laela ninji, muku singe omunjili ku munjili.

Olutimbo no Litunga

¹⁸ Nji elitunga kame limi timbile, mulimuke nji kame lina tateke okutimba mene oweli ekalya sitimba anyi.

¹⁹ Kambe kame muli asi litunga, elitunga kame lisinga esi sili salyo. Kono kakuli kasa muli ano litunga, kono kame nina mikete mu litunga, bokame abo elitunga aba limi timbile.

²⁰ Mu puluke eliywi elyo nina kumyambeke nji, 'Omubika kasa wakuneneba okubitelela Molyaye.' Nji kame ani yandisa, mba mi yandisa naanyi, nji kame ana mamele eliywi lyange, mba mamele ngeso ni lyenu.

²¹ Kono kame sami tende eyo yonje mulibaka lyange, kakuli kayii woyo ona ni tumu.

²² Kambe kani siiya mu kwaambela kambe kakwite esibi, kono cwale kaku tatula ku sibi soo.

²³ Woyo onitimbile kame atimbile ngeso ni Sitange.

²⁴ Kambe ka ni sitenda mukaci koo emisebezi eyo kakwisa omunu ona itende, kambe kakwite esibi kono cwale kame ana mono, mane kame atimbile mene bamweya ni Sitange.

²⁵ Neli okwiyateteta eliywi elyo lina kuñoliwa mu mulawo woo nji, 'Kame ani timbile feela okuwile omubonda.'

²⁶ Kono cwale Omombaombi aba saiye, woyo sani tume kwaanyi okutunda kwa Sitange. Simba Emebo no niti eyo saitunde kwa Sitange kame saibe oupaki kwa mene.

²⁷ Cwale naanyi mba mwipaka, kakuli namwikala ni mene okutunda ku matatekelo.

16

¹ Kame nina myambele eyo nji mulese oku sitatala.

² Mba mitundisa mu tindoo no milapelo mane enako kame iiya eyo omunu yonje oso miibaa, mba yambuta nji kame abelekela Nyambe.

³ Cwale mbami tende einu eyo kakuli kasi limuka Sitange simba mene.

⁴ Kono kame nina myambele einu eyi nji cwale enako yoo aba saiye, mba puluka nji kame nina ku myambela einu yoo.

Omusebezi no Mebo No Kukena

Ka nisi myambela einu eyi mu matangiseto, kakuli kame nina kwikala naanyi.

⁵ Kono cwale kame nita kwa woyo ona kuni-tuma, mi kakwisa kwaanyi woyo soni ibanguta nji kubine ukatile.

⁶ Kono kakuli kame nina myambebe einu eyi, elikenyi naliyala mu micima yenu.

⁷ Simbakutendengeso kame nina myambela eniti, kame kumi lukeele aba nita kakuli aba niulwa okuta, Omuombaombi katamba okwi-ya kwaanyi. Kono aba nita, mba nimu tumu kwaanyi.

⁸ Cwale aba saiye, mba kolwisa elitunga mulibaka no sibi, okuluka mane ni katulo.

⁹ Okukumanena ni sibi kakuli ka pumene mwa mene,

¹⁰ okukumanena ni kuluka kakuli kame nita kwa Sitange, mi kamu tamba kuni mona

¹¹ okukumanena ni katulo, kakuli omubusi no litunga lino na atuliwa.

¹² Ni sili neyi no kupula no kumyambela, kono kamu twese okwi-yupisisa bano.

¹³ Emebo no niti aba saiye, kame sa mi twale mu niti yonje kakuli ka tamba okwambela yonyene, kono mba myambebe eyi ana yupu yonje mane ami lemuse neyi isiya.

¹⁴ Mba nikanyisa, kakuli mba shimbi kweyi ili yange, mi mba myambebe yo.

¹⁵ Esi sonje ali naso Sitange sange, cwalehe kame ninaamba nji mba shimbi kwesi sili esange, mi kame sami limukise so.

Okweena ni Kuwabelelwa kwa luli

¹⁶ Kwesili enakoicana, mi ka mu tamba kuni mona, mi kame enakoicana mba muni mono.

¹⁷ Anjili kwa iyetwa aye sebeli akwambota omunjili ku munjili nji, “Iikene eyi aamba wuyu kwaaci? Nji mu nako icana feela kamutamba kuni mona, mi mu nako icala kame mbamu nimono ni kwamba nji, ‘Kame nita kwa Sitange.’

¹⁸ Seli aamba nji iikene aba aamba nji, ‘Mu nako icana feela?’ Katuyii esi atalusa.”

¹⁹ Jesu muku limuka nji kame asinga okumwibanguta, cwale sebeli wamba kwa onyene nji, “Esi sokame mukwibanguta mukaci kenu nji ‘Mu nako icana feela kamutamba kunimona, mi mu nako icana kame mbamu nimono’?

²⁰ Niti luli kame ni myambela nji mba mu lili, mane kame sa mu bokolole, mi elitunga mba linyakalala. Mba mweene, kono okweena kwenu mba kufutuka okuwabelelwa.

²¹ Omukati aba aleya kame akukalelwa, kakuli enako yaye na ikeela, kono aba amana okuleya omwana, ka puluka eñalelwa yaye, mulibaka no kuwabelelwa nji omwana na leiwa mu litunga.

²² Naanyi ngeso, kame muli mu likenyi bano, kono mba nimi mono kame emicima yenu mba iwabelelwa. Mi kakwisa omunu so mi byangula okuwabelelwa kwenu.

²³ Ba liywaa elyo kamu tamba kuni ibanguta simweya. Niti luli kame ni myambela nji eso sonje sa mukumbele kwa Sitange, mba mibi so mu litina lyange.

²⁴ Kubitela bano ka mu sikumbela simweya mu Litina lyange. Mu kumbele mi mba musu biwi, nji okuwabelelwa kwenu kutende okuno kwiyala.

Okukoma Elitunga

²⁵ “Kame nina myambele eyi mu tinguli. Kono enako kame iiya, eyi sa ni lesele okwamba naanyi mu tinguli, ni myambele eniti eyi ya Sitange.

²⁶ Eliywaa elyo, kame sa mu kumbele mu Litina lyange, mi ka naamba nji mbani mi lapelele kwa Sitange.

²⁷ Kakuli Sitange yonyene kame amisinga, kakuli namu nisingi, mi kame muna pumene nji kame nina tundu kwa Sitange.

²⁸ Kame nina tundu kwa Sitange, mi kame ni neeyi mu litunga kono cwale kame ni siya elitunga okuuka okuta kwa Sitange.”

²⁹ Aiyetwa aye sebeli aamba kwa yonyene nji, “Omone, cwale kame wamba wino, kasa okwamba mu tinguli.

³⁰ Cwale na tu lemuha nji kame ulimuka einu yonje, mi ku saele nji omunu a kwibangute. Mumukwanongeso, kame tu pumena nji kame utunda kwa Nyambe.”

³¹ Jesu sebeli otambula nji, “Cwale bano kame mu pumena?

³² Enako kame ikeyile, mane naikeela, eyi sa muhasane, munu ni munu ku ndoo yaye mi mba mu ni siyi memboci. Kono ka nili memboci, kakuli Sitange kame ali ni mene.

³³ Kame nina myambele eyo nji mwamene mwikale ni kozo mu micima mulibaka lyange. Kame sa muyandisiwe mu litunga kono mongole emicima, kame nina komo elitunga.”

17

Jesu yo Kulapelela Yonyene

¹ Cwale Jesu aba ana kumana okwamba amaywi awo, sebeli waliketa amiyo aye ku wilu ni kwamba nji, “Sitange, enako naikeela. Okanyise Mwanowe nji Omwana aku kanyise.

² Kakuli kame ona mubi amaata beulu no aanu onje, okuba omoyo no kwaabwa kwa woyo yonje ona mubi.

³ Uno omoyo no kwaabwa, nji aku limuke, wene Nyambe no niti ni Jesu Kilesite woyo ona kutuma.

⁴ Kame ni kukanyisa mu litunga, mukumana omusebezi ona kuniba mu litunga nji ni utende.

⁵ Cwale bano Sitange, onikanyise ba lubala lowe ni kanya iya nina kwikala nayo ni weene abo elitunga ekalya sumbiwa kale.”

Jesu yo Lapelela Aiyetwa Aye

⁶ “Kame nina limukisa elitina lyowe kwaanu ona nibi mu litunga. Kame ali kwa wene mi nonibi woo mane na mamele eliywi lyowe,

⁷ cwale kame alimukile nji esinu sonje eso ona nibi, kame situnda kwa wene.

⁸ Kakuli kame ninaabi amaywi ona nibi, mi kame anaa tambula mane na limuka muniti nji kame ninatundu kwa wene, mi na pumene nji kame ona nitumu.”

⁹ Kame na lapelela. Silapelele elitunga kono kame nilapelela awo ona nibi, kakuli owe.

¹⁰ Yonje eyo nili nayo yowe, mi yowe yange, mi kame ni kanyisiwa mwa onyene.

¹¹ Cwale bano silimo mu litunga, kono onyene kame ali mu litunga mi mene kame ni keyile kwa wene. Sitange No Kukena, wateule mu litina lyowe, elyo onanibi wene nji atende amweya kanyi aci.

¹² Abo meni sili noo, kame nina kwateula mu litina lyowe, awo ona kuniba, mi kame nina kwa sileleza mi kwa onyene kakwisa woyo ona tauka, konji woyo anakulimuka nji mbatauka, nji elinolo liyatetetwe.

¹³ Kono bano kame ni iya kwa wene, mi einu eyi naamba mu litunga, nji cwale aikale ni kuwabelelwa kwange nji iyatetetwe mwa onyene.

¹⁴ Kame ninaambe eliywi lyowe, mi elitunga kame lyatimbile kakuli onyene kaa ano litunga, kanyi mene aba ka nili osi litunga.

¹⁵ Ka niku lapelele nji wa tundise mu litunga, kono nji wa sileleze kwa woyo no kwiiba.

¹⁶ Kasa ano litunga lino, kanyi mene aba ka nili osi litunga.

¹⁷ Wakenise mu niti yowe kakuli eliywi lyowe lyokame eniti.

¹⁸ Kanyi aba ona nitumu mu litunga, cwale ni mene kame ninaa tumu mu litunga.

¹⁹ Mi mulibaka lyoo kame ni kukenisa menyene, nji nonyene abiwe okukenisa mu yonyene eniti.

Jesu yo Lapelela Alupumena Onje

²⁰ “Ka nilapelele onyene feela, kono kame ni lapelela ngeso nawo sa pumene mwa mene mu liywi lyoo.

²¹ Nji onje atende mumweya, kanyi wene Sitange aba uli kwa mene, ni mene kwa wene. Nonyene ngeso atende mumweya kwaaci, nji elitunga li pumene nji tiwe ona nitumu.

²² Ekanya eyo ona nibi kame ninaibi kwa onyene nji atende amweya kanyi aci aba tuli mumweya.

²³ Mene, ni ikale kwa onyene, ni wene kwa mene, ni atendiwe asi kupetahala mu umweya, mi elitunga li limuke ni tiwe onani tumu, ninji kame onaa singi kanyi omu ona nisingele.

²⁴ “Sitange, kame ni lakaza ni awo onanibi aikale ni mene omo nili, ni amone ekanya yange eyo onakuniba kakuli kame ona kunisinga elitunga eka lyasitendiwa kale.

²⁵ Wene Sitange no kuluka! Elitunga kalikuyii, kono mene nikuyii, mi nonyene kame ayii ni nauni tumu.

²⁶ Kame ninaa simwete elitina lyowe, mi mba na simweta lyo, kakuli elilato ona nisingi liikale mwa onyene, mane nimene niikale mwa onyene.”

18

Okunungiwa kwa Jesu

(Mateu26.47-56; Maleka14.43-50; Luka22.47-53)

¹ Cwale Jesu aba ana kumana okwamba amaywi aa, sebeli ota naiyetwa aye mu linjaliya no Kasindi no Kediloni, omo kuna kwikala elitema, mi sebeli oingenamo na iyetwa aye.

² Cwale Judasi woyo ona kumu beteka, kame ana kulimuka esibaka eso, kakuli Jesu mwana ku kuwanenanga na iyetwa aye aka no kupula.

³ Cwale Judasi sebeli oshimba esikwata no Masole ni tinumwana eti titunda kwa pulisita akulu nafalisi, sebeli ata mu litema ni tilambi ni mamonyi, mane neyi no kulwisa.

⁴ Cwale Jesu muku limuka eso sasi mwiyele, sebeli wiiya kwa onyene ni kwamba ni, “Anyine musaela?”

⁵ Seli amutambula nji, “Jesu no Nazaleta,”
Jesu sebeli wamba kwa onyene nji, “Yamene.”
Judasi, ona kumubeteka, yo imanine noo.

⁶ Aba ana kwaambela nji, mene uno, sebeli
auka ngombemongo, ni kukwela banji.

⁷ Jesu sebeli waibanguta kame nji, “Anyine mu
saela?”

Seli aamba nji, “Jesu no Nazaleta.”

⁸ Jesu sebeli waatambula nji, “Kame nina
myambele nji, yamene uno,” “Nji kame mu saela
mene, mu lesele aa alume akutele.”

⁹ Neli nji kwiyaetetetwe eliywi eli ana kwamba
nji, “Ka nisi taukelwa omunu simba mumweya,
kwawo ona nibi.”

¹⁰ Cwale Simoni Pitulosi ona kulema omuk-
wale, sebeli oushomona ni kuuyaa omubika no
mupulisita omukulu, mi sebeli omu patula elitwi
no silyo, Omubika woyo kame ana kwisaniwa nji
Malukuse.

¹¹ Jesu sebeli wamba kwa Pitulosi nji, “Ouse
omukwale mu sipusu sao. Ninji nikwangwe
okunwa mu sinweno esi ana nibi Sitange?”

Jesu yoli ba Lubala lwa Anasi

¹² Cwale esikwata no masole ni mwendisi waso
ni tinumwana naendisi no Majuda, sebeli alema
Jesu ni kumu nunga,

¹³ mi sebeli amu twala oweli kwa Anasi, kakuli
neli njemunwaye Kayafa woyo ona kutendanga
omupulisita mukulu mu mwaka owo.

¹⁴ Kayafa yokame ona kweleza aendisi no Ma-
juda nji kame kufanena nji omunu mumweya
afela aanu.

Pitolosi yo Kana Jesu

(Mateu26.69-70; Maleka14.66-68; Luka22.55-57)

¹⁵ Simoni Pitolosi kame ana kukoñanga Jesu, bamweya ni mwiyetwa munjili. Omwiyetwa woyo kame ana kulimukiwa kwa mupulisita mukulu, cwale sebeli oingena bamweya ni Jesu mu lilapa no mupulisita mukulu,

¹⁶ ababo Pitolosi yo imanine kundee ba mweelo. Cwale omwiyetwa munjili woyo ona kulimukiwa kwa mupulisita mukulu sebeli obanena kundee nukaamba ni mutateleli naba mweelo, mi sebeli oingenyeka Pitolosi mu lilapa.

¹⁷ Cwale omutateleli naba mwelo sebeli wamba kwa Pitolosi nji, “Kana ni wene kame uli omunjili nwaa iyetwa no munu wuyu?”

Pitolosi sebeli otambula nji, “Kokuulwa, kasa mene.”

¹⁸ Cwale abika ni tinumwana tina kwikala omo sebeli atumbula omulilo, kakuli kame kuna kom-bola mi kame ana kwimana ayota omulilo. Ni yonyene Pitolosi na kwikala noo yoimanine okuy-ota omulilo.

Omupulisita mukulu yo Ibanguta Jesu

(Mateu26.59-66; Maleka14.55-64; Luka22.66-71)

¹⁹ Omupulisita omukulu sebeli oibanguta Jesu mulibaka no aiyetwa aye ni tuto yaye.

²⁰ Jesu sebeli otambula nji, “Kame ninaamba aba no kukena kwaanu, aka no kupula kame nina kwa iyeta mu tindoo no milapelo, omo anaku kuwanenanga Amajuda onje, mi kanasi kwamba esinjili ku nyonga.

²¹ Iikene aba oni ibanguta? Oibangute awo ana niyupu esi ninaamba kwa onyene kame ayii eyi naamba.”

²² Cwale Jesu aba ana kumana okwamba eyi, omunjili no atateleli ona kwimana abeebi ni yonyene, sebeli omu fula ni lyoko lyaye ni kwamba nji, “Mokame omo otambulela omupulisita mukulu!”

²³ Jesu sebeli omu tambula nji, “Nji kani saamba wino, otaluse eso sinaibi, kono nji kame ni-naamba wino, siikene eso oni fulela?”

²⁴ Cwale Anasi sebeli omu tumena kwa Kayafa omupulisita omukulu yo nungilwe.

Pitolosi yo Kana Jesu Kame

(Mateu26.71-75; Maleka14.69-72; Luka22.58-62)

²⁵ Cwale Simoni Pitolosi yo imanine okututumu na ku mulilo. Seli aamba kwa yonyene nji, “Kasanji ni wene kame uli omunjili no aiyetwa aye?”

Pitolosi sebeli okana ni kwamba nji, “Kokuulwa kasa mene.”

²⁶ Omunjili kwabika no mupulisita omukulu, omwabaye woyo ona ku patuliwa elitwi kwa Pitolosi, sebeli omwibanguta nji, “Kanisi ku kumona ni yonyene mu litema?”

²⁷ Pitolosi sebeli okana kame mi ababo, omukombwe sebeli olila.

Jesu Yoli ba Lubala lwa Pilato

(Mateu27.1; 2; 11.14; Maleka15.1-5; Luka23.1-5)

²⁸ Cwale sebeli atundisa Jesu mu ndoo ya Kefasi okumutwala ku kuta, neli amasiku. Kono onyene

kasikwingena mu Kuta, nji cwale onyene aulwe ouku silafaza, kono atwese okulya Epaseka.

²⁹ Cwale Pilato sebeli obanena kwa onyene ni kwaibanguta nji, “Iikene mu mukandimeka wuyu mulume?”

³⁰ Sebeli amutambula nji, “Nji wuyu mulume kasitenda eyi no kwiiba, kambe katusi mulita kwa wene.”

³¹ Pilato sebeli wamba kwa onyene nji, “Mu mushimbe anyi, mi mu mwatule ni mulawo wenu.”

Aendisi no Majuda sebeli amu tambula nji, “Kasa etukelo yetu nji twibae omunu.” (

³² Esi neli okwiyateteta eliywi elyo ana kwamba Jesu okumonisa elifu safe.)

³³ Cwale Pilato sebeli oingena mu Kuta kame ni kwisana Jesu ni kumwibanguta nji, “Tiwe Ombumu no Majuda?”

³⁴ Jesu sebeli otambula nji, “Kana kame okwambela feela mu maata owe nji anjili onakwambele yo mulibaka lyange?”

³⁵ Pilato sebeli otambula nji, “Kana mene kame nili Omujuda? Aanu owe napulisita akulu kame ana kuliti kwa mene. Iikene ona tende?”

³⁶ Jesu sebeli otambula nji, “Omubuso wange kasa no litunga lino, kambe omubuso wange neli ouno litunga lino, kambe abika ange kame alwa ni kuulwa kuniba kwa endisi no Majuda. Kono cwale omubuso wange kasa wa litunga lino!”

³⁷ Pilato sebeli oibanguta Jesu nji, “Kame uli Ombumu?”

Jesu sebeli otambula nji, “Kame wamba nji kame nili Ombumu. Sokame esi nina leyelwe,

mane sokame nina iyele mu litunga nji nipake eniti. Omunu yonje woyo oli no niti kame ayupa eliywi lyange.”

³⁸ Pilato sebeli omwibanguta nji, “Cwale eniti niikene?”

Jesu yo Atulelwa Elifu

(Mateu27.15-31; Maleka15.6-20; Luka23.13-25)

Munyima no kwamba eyi sebeli obanena kame ku Majuda ni kwaambela nji, “Kani siwana omubonda mwa yonyene.

³⁹ Kono kame muli ni sizo senu nji kame nifanena okumi lukulwela omunu mumweya ba Paseka. Kame muni pumena nji nimi lukulwele Ombumu no Majuda?”

⁴⁰ Cwale sebeli akuwa kame nji, “Kokuulwa kasa wuyu mulume! Kono Banabasi!” Mi abo Banabasi neli sisinyi.

19

¹ Cwale Pilato sebeli oshimba Jesu ni kumushapa.

² Mi amasole sebeli atinga eñata no myunguya ikufekile kanyi omushukwe ni kwibeeka ku mutwi wa Jesu mane sebeli amufuka esikumango no undilu

³ cwale sebeli asheteta kwa yonyene ni kwamba nji, “Yoosho, Ombumu no Majuda!” Mi alemine oku mufula ni maoko oo.

⁴ Pilato sebeli obana kame ni kwamba kwa onyene nji, “Komumone kame ni mulita kwaanyi cwale mulimuke nji kanisiwana omubonda mwa yonyene.”

⁵ Cwale Jesu sebeli obana, yo ku fukile omushukwe no myunguya, ni sikumango no undilu. Pilato sebeli wamba kwa onyene nji, “Komumone wuyu munu!”

⁶ Cwale apulisita akulu naanu oo, aba ana kumumona, sebeli akuwa nji, “Omungongotele! Omungongotele!”

Pilato sebeli wamba kwa onyene nji, “Mu mushimbe anyi, mi mumu ngongotele, kakuli kani siwana omubonda mwa yonyene.”

⁷ Aendisi no Majuda sebeli amu tambula nji, “Kame tuli ni mulawo, mi mu mulawo wetu kame afanena okufa, kakuli kame ana kwamba nji Mwana Nyambe.”

⁸ Cwale Pilato aba ana kuyupa amaywi awo, sebeli ocila onene.

⁹ Seli oingena kame mu Kuta, mi sebeli oibanguta Jesu nji, “Kubine uka tundile?”

Kono Jesu kasiku mutambula.

¹⁰ Pilato sebeli wamba kwa Jesu nji, “Iikene aba ka wamba nange? Ka uyii nji kame nili ni maata no kuku lukulula, ni maata no kuku ngongotela ba sifapano.”

¹¹ Jesu sebeli omutambula nji, “Kaukwite amaata beulu yange konji na wabiwi okutunda ku wilu, cwalehe woyo ona kubi mene kwa wene yokwite esibi no kuneneba.”

¹² Mukuyupa amaywi awo, Pilato sebeli osinga oku mulukulula. Kono aendisi no Majuda sebeli akuwa nji, “Nji kame omu lukulula, kau sepahala kwa Sesale kakuli omunu yonje aba akutenda Oumbumu, kame alwisa Sesale!”

¹³ Cwale Pilato aba ana kuyupa amaywi aa, sebeli otwala Jesu kundee, ni kwikala ba sipula no katulo, mu sibaka si isaniwa nji “Liwee limak-ilwe.” Mi mu Sihebelu kame italusa nji “Gabata.”

¹⁴ Cwale neli eliywaa no ukutukiseta Epaseka, mi kame ina ku singa okutenda enako no kamwii luli likumi ni twiili, (12 okuloko). Mi Pilato sebeli wamba kwa endisi no Majuda nji, “Komumone, Ombumu wenu uno!”

¹⁵ Kono onyene kame ana kukuwa, nji, “Atwaliwe! Atwaliwe! Omungongotele!”

Pilato sebeli wamba kwa onyene nji, “Ni ngongotele Ombumu wenu?”

Kono apulisita akulu sebeli atambula nji, “Ka tukwite Ombumu mundina, konji Sesale!”

¹⁶ Cwale Pilato sebeli waaba Jesu nji angongoteliwe ba sifapano.

Jesu aba ana Kungongoteliwa ba Sifapano.

Mi sebeli ashimba Jesu, ni kuta naye.

¹⁷ Cwale sebeli ashimba Jesu ni kushimbisa esi-fapano saye nikuta ku sibaka siisaniwa nji Katen-dele, eso siisaniwa nji Gologota mu Sihebelu.

¹⁸ Abo sebeli amu ngongotela ba sifapano, nan-jili ayiili, omunjili kweeli elineku, omunjili kweeli elineku, Jesu yoli mukaci koo.

¹⁹ Pilato sebeli oñola eliñolo no kulimukisa ni kulituleka ba sifapano. Kame kuna kuñoliwa nji, “Jesu no Nazaleta, Ombumu no Majuda.”

²⁰ Amajuda no kupula sebeli abala beulu no sifapano abo, kakuli esibaka ana ku ngongotelwa Jesu ba sifapano, kame sina kwikala abeebi ni mu-leneñi. Beulu kame kuna kuñoliwa mu Sihebelu, mu Siloma, ni mu Singelike.

²¹ Apulisita akulu no Majuda sebeli aiya mu kwambela Pilato nji, “Olese okuñola nji, ‘Ombumu no Majuda,’ kono oñole nji, ‘Yonyene ona kukwamba nji, Time Ombumu no Majuda.’”

²² Pilato sebeli otambula nji, “Esi nina ñolo, na si ñoliwa.”

²³ Cwale amasole aba ana kumana oku ngongotela Jesu ba sifapano, sebeli ashimba eikumango yaye, sebeli aitaba etikalulo tinee, nji omunjili ni munjili aikale ni saye. Seli ashimba ni sonyene esikumango na kunji kono esikumango eso kasi sikwikala ni mapeka, kame sina kutungiwa ngeso esinu simweya feela.

²⁴ Seli akwambota mukaci koo nji, “Tulese okusikaula, kono tusi shebuluke, tu limuke nji kame sa sitende sa nyine.” Neli nji kutendahale esi sinambiwa mu liñolo nji,

“Sebeli akutabela eikumango yange

mi kame ashebuluka esikumango sange.”

Sokame ana tende Amasole.

²⁵ Cwale abeebi ni sifapano sa Jesu kame kuna kwikala Inawaye ni minaye Inawaye, Maliya, omoywa Kulopasi, ni Maliya Magadalena.

²⁶ Jesu aba ana kumona Inawaye, ni mwiyetwa ana kusinga, aimanine abeebi ni yonyene, sebeli wamba kwa Inawaye nji, “Mukati, omone mwanowe.”

²⁷ Cwale Jesu sebeli wamba kwa mwiyetwa nji, “Komone, Inaowe.” Mi okutunda abo, omwiyetwa sebeli omu twala ku lilapa lyaye.

Elifu lya Jesu

(Mateu27.5-56; Maleka15.33-41; Luka23.44-49)

²⁸ Eyo aba ina kubwa, Jesu ba kulimuka nji einu yonje na ipetahala, sebeli wamba nji, eliñolo liiyatetetwe “Kame nifile elinyotwa.”

²⁹ Kame kuna kwikala esindunga sina kwiyaala ebenega omo, cwale sebeli abeeka esiponji sina bekiwa mu benega niku sishomeka ku lunupa no hisopa, mi sebeli asi sheeteta ku kanwa kaye.

³⁰ Cwale Jesu aba ana kumana okunwa ebenega sebeli wamba nji, “Na kubu!”

Cwale sebeli okobeka omutwi mane niku kuba Emebo yaye.

Jesu yo Yaiwa Embiinji ku Lubaci

³¹ Kakuli neli eliywaa no Ukutukiseta omukiti no Paseka. Amajuda kasikusinga nji olutu lwikale ba sifapano ba liywaa no Pumulo kakuli Epumulo eyo neli eliywaa no utokwa onene, cwale aendisi no Majuda sebeli akumbela Pilato nji amakondo nwawo ali ba sifapano simba acoka mi mane kame atwesiwa okushimbiwa.

³² Cwale amasole sebeli aiya nikucola amakondo no munu no weli ni wuyu no wiili awo ana kungongoteliwa ni Jesu.

³³ Kono aba ana kukeela kwa Jesu, sebeli amona nji nafu, kasi kucola amakondo aye.

³⁴ Kono omunjili no masole sebeli omuyaa ku lubaci ni mbiinji, mi mu wangu sebeli otunda ounyinga ni meyi.

³⁵ Mi woyo ona mono eyo ni paki, mi oupaki waye niwa niti, mi kame ayii nji kame aamba eyi no niti, nji naanyi mu pumene.

³⁶ Kakuli einu eyi naitendahala nji eliñolo liiy-atetetwe, eli lyaamba nji, “Kakwisa esifuba saye sasi coliwe.”

³⁷ Kame eliñolo linjili kame lyamba nji, “Mba mono woyo ana yaa.”

Okupumbekiwa kwa Jesu

(Mateu27.57-61; Maleka15.42-47; Luka23.50-56)

³⁸ Aba ku nakubwa eyi, Josefa no Alimateya omwiyetwa wa Jesu, kono kunyonga mukucila aendisi no Majuda sebeli okumbela Pilato nji ashimbe olutu lwa Jesu. Mi Pilato sebeli opumena okushimba olutu lwa Jesu.

³⁹ Nekudemasi niyonyene ona kwiiya oweli ousiku kwa Jesu, sebeli oiya okulita milasi ni aloye inakuwanekiwa, inakukwana owima ukuma ba mwanda no tipondo.

⁴⁰ Seli ashimba esitupu sa Jesu, ni kusipungela mu lwambi bamweya neyo ina kuwanekiwa, mu mukwa no sizo no Majuda owo anakupumbeka nawo afu.

⁴¹ Mi mu sibaka ana ku ngongoteliwa kame kuna kwikala elitema, mi mu litema elyo kame kuna kwikala eliyumbelo no ubya, omo mu na kuulwa okupumbeka mo kale omunu.

⁴² Cwale kakuli neli eliywaa no Majuda no Uku-tukiseta omukiti no Paseka, mi kakuli eliyumbelo kame lina kwikala abeebi, sebeli apumbekamo Jesu.

20

Eliyumbelo muulwile Esinu

(Mateu28.18; Maleka16.1-8; Luka24.1-12)

¹ Cwale ba liywaa no weli mu sunda, Maliya Magadalena sebeli omenekela ku liyumbelo kusi-ilolile mi sebeli omona nji eliwee na litundisiwa ba liyumbelo.

² Cwale sebeli oitukela kwa Simoni Pitolosi ni ku mwiyetwa woyo ona ku singiwa kwa Jesu, ni kwamba kwa onyene nji, “Kame ana tundisa Ombumu mu liyumbelo, mi katuyii oko ana mubeeke!”

³ Cwale Pitolosi sebeli oimana ni mwiyetwa omunjili mi bamweya sebeli ata ku liyumbelo.

⁴ Kame ana kwituka onje ayiili, kono omwiyetwa omunjili sebeli oituka okusiya Pitolosi, mane nukakeela oweli ku liyumbelo.

⁵ Cwale sebeli onangelamo nikumona etinyambi ti bekilwe banji, kono kasi kwingena mo.

⁶ Cwale Simoni Pitolosi sebeli okeela ona ku-mukoña, mi sebeli oingena mu liyumbelo. Seli omona etinyambi tibekilwe banji,

⁷ ni lwambi luna kumufuka ku mutwi. Kono lonyene kalusi kubekiwa bamweya ni tinjili, kono lonyene kalu sikuwanekiwa ni tinyambi tinjili kono kame luna kupungiwa lomboci, olu bekilwe kunyonga.

⁸ Cwale omwiyetwa omunjili ona kutateka oka-keela ku liyumbelo, sebeli oingena ni yonyene mane nikumona, mi sebeli opumena. (

⁹ Kakuli kasi kuyupisisa kale eliñolo eli lyamba nji Jesu kame ana kufanena okwinguka kwaafu.)

¹⁰ Cwale aiyetwa awo, sebeli aukela ku mindi yoo.

*Jesu yo Kumonahaza kwa Maliya Magadalena
(Mateu28.9-10; Maleka16.9-11)*

¹¹ Kono Maliya sebeli oimana yo lila kundee no liyumbelo. Mi yolila sebeli obama ni kwaliketa mu liyumbelo

¹² ni kumona amangeloi ayiili akufukile eyi no likena, aikalile omo ana kulangeka olutu lwa Jesu, elinjili ku mutwi elinjili kwilyatiso.

¹³ Mi sebeli amwibanguta nj, “Mukati iikene olila?”

Yonyene sebeli otambula nj, “Kakuli kame anashimbi Ombumu wange, mi kani yii omo ana mubeeke!”

¹⁴ Osamba ngeso sebeli okutemuna ni kumona Jesu yo imanine, kono kasi kulimuka nj neli Jesu.

¹⁵ Jesu sebeli omwibanguta nj, “Mukati, iikene olila?” “Anyine osaela?”

Yonyene ba kuyambuta nj niosi kulima elitema, sebeli wamba nj, “Molyange, nj wene ona mushimbimo, onambele omo ona mubeeke nika mushimbe.”

¹⁶ Jesu sebeli wamba kwa yonyene nj, “Maliya!” Yonyene sebeli okutemuna ni kwamba kwa yonyene mu Sihebelu nj, “Labboni!” (Okutalusa nj, “Mwiyeti”.)

¹⁷ Jesu sebeli wamba kwa yonyene nj, “Olese okunilema,” “Kakuli kani siuka kale kwa Sitange. Kono ote kwa singiwa ange okaambele nj, kame nita kwa Sitange yonyene Siteni, kwa Nyambe wange yonyene Nyambe wenu.”

¹⁸ Maliya Magadalena sebeli ota nuka simweta aiyetwa nj kame ninamono Ombumu, ni kwaambela nj kame ana mwambele einu eyi.

Jesu yo Kumonahaza kwa Iyetwa aye
(Mateu28.16-20; Maleka16.14-18; Luka24.36-49)

¹⁹ Ba mangolwaa no liywaa elyo, eliywaa no matatekelo mu sunda emyelo eyi pakilwe omo ana kwikala aiyetwa okucila aendisi no Majuda, Jesu sebeli oiya mukwimana mukaci koo ni kwamba kwa onyene nji, “Ekozo ikale naanyi.”

²⁰ Jesu aba ana kumana okwamba ngeso, sebeli waamonisa amaoko ni lubaci lwaye. Cwale aiyetwa sebeli awabelelwa onene aba ana kumona Ombumu.

²¹ Jesu sebeli wamba kwa onyene kame nji, “Ekozo ikale naanyi. Kanyi omu ana ni tumene Sitange, ni mene kame ni mituma ngeso.”

²² Cwale aba ana kumana okwamba eyi, sebeli waoyelela beulu yoo mane nikwamba kwa onyene nji, “Mu tambule Emebo No Kukena.

²³ Nji kame sa mulemene eibi no munu yonje, kame sa ilemenwe, nji kamwa lemene eibi yoo, katamba okwilemenwa.”

Jesu ni Tomasi.

²⁴ Cwale Tomasi omunjili no kukwana likumi nayiili, (wisaniwa nji Mbile) ka sikwikala nonyene Jesu aba ana kwiiya.

²⁵ Cwale anjili aiyetwa sebeli amwambela nji, “Na tumono Ombumu!”

Kono Tomasi sebeli wamba kwa onyene nji, “Konji aba sani mone mu maoko aye omo kunakuyaa esipikili mane nibeeekemo omunwe wange mu liñiba muna kuyaa esipikili ni kulema amaoko ange ku lubaci lwaye, kani tamba kupumena.”

²⁶ Munyima no maywaa atanu ni aatu (8) aiyetwa aye aali kame mu ndoo ni Tomasi yoikalile noo. Emyeelo eipakilwe, kono Jesu sebeli okeela ni kwimana mukaci koo ni kwamba nji, “Ekozo ikale naanyi.”

²⁷ Cwale sebeli wamba kwa Tomasi nji, “Obeeke omunwe owe muno, omone ni maoko ange os-himbe amaoko owe obeeke ku lubaci lwange cwale olese oku tenda wuyu no kwapumena, kono opumene!”

²⁸ Tomasi sebeli otambula nji, “Ombumu wange, ni Nyambe wange!”

²⁹ Jesu sebeli wamba kwa yonyene nji, “Nupumene kakuli nu nimono? Embuyoti yawo ana pumene naba kasi mona!”

Etuso no Buka Eyi

³⁰ Cwale Jesu natende etimakazo no kupula balubala no aiyetwa, eyo kaisi ñoliwa mu buka eyi.

³¹ Kono eyi nai ñoliwa nji mupumene nji Jesu yokame Kilesite, Omwana Nyambe, mi cwale okupumena kwenu mwikale ni moyo mu litina lyaye.

21

Jesu yo Kumonahaza kwa Iyetwa aye Atanu nayiili (7)

¹ Munyima no eyi, Jesu sebeli oku monahaza kame kwa iyetwa aye, kunyonga no lisa no Tibeliya mi sebeli oku monahaza mu mukwa ou.

² Simoni Pitolosi, Tomasi woyo ona kwisaniwa nji Mbile, Natanaele na mu Kana no Galileya,

naana a Zebediya, na njili ayiili no aiyetwa aye kame ano kuwana.

³ Simoni Pitolosi sebeli wamba kwa onyene nji, “Kame nita mu kuyamba.”

Seli aamba kwa yonyene nji, “Naaci kame tuta niwene.” Seli ata mane nukaku longa mu wato, kono ousiku owo kasi kuuya esinjili.

⁴ Aba kuna kupatalala, Jesu sebeli oimana ba likamba, kono aiyetwa kasi kulimuka nji neli Jesu.

⁵ Jesu sebeli waaibanguta nji, “Anukana, kamu kwite ondi simba mumweya?”

Seli amu tambula nji, “Ka kwisa.”

⁶ Cwale Jesu sebeli waambela nji, “Muyambe akanyandi ku lineku no silyo no wato, mi mba muwana esinjili.” Seli ayamba, mi sebeli akwangwa okuyambula akanyandi, mulibaka no tindi okupula.

⁷ Cwale omwiyetwa woyo ona kusingiwa kwa Jesu, sebeli wamba kwa Pitolosi nji, “Mbumu wuyu!” Cwale Simoni Pitolosi aba ana kuyupa nji Mbumu wuyu, sebeli okufuka esikumango saye kakuli kame ana kutundisa yo sebeza, ni kumatukela mu liwate.

⁸ Kono aiyetwa anjili sebeli aiya ni wato alemine okuyambula akanyandi akaiyalile etindi. Kakuli kame ana kwikala abeebi kanyonyo ni likamba, neli amatambo no kukwana omwanda mumweya.

⁹ Cwale aba ana kumana okufuweka owato ba likamba, sebeli amona amakala no mulilo abo ni ndi yoboniwabo ni sinkwa.

¹⁰ Jesu sebeli wamba kwa onyene nji, “Mu lite ku tindi eti muna uyu.”

¹¹ Simoni Pitolosi sebeli oingena mu wato nikukokela akanyandi ku likamba aka kaneyala etindi no kuneneba eti tina kukwana omwanda mumweya ni makumi atanu ni twaatu (153) cwale simba nji etindi kame tina kupula ngeso, akanyandi kaka sikukauka.

¹² Jesu sebeli wamba kwa onyene nji, “Mwiiye mulye.” Mi kwa iyetwa ka kwisa wuyu ona kongola oku mwibangute nji, “Tiwe anyine?” Kakuli kame ana kulimuka nji Mbumu.

¹³ Cwale Jesu sebeli oshetetako, ni kushimba esinkwa mane bamweya ni ndi mi sebeli waaba.

¹⁴ Aka cwale neli aka no waatu ako ana kuku-monhaza kwa iyetwa munyima no kwingulwa kwaafu.

Jesu ni Pitolosi

¹⁵ Cwale aba ana kumana okusuka, Jesu sebeli oibanguta Simoni Pitolosi nji, “Simoni Omwana Jowani, kana kame oni singa okubita aa?”

Seli otambula nji, “Ee Mbumu, kame uyii nji kame niku singa.”

Jesu sebeli wamba kwa yonyene nji, “Olise otwana no mikoko yange.”

¹⁶ Jesu sebeli omwibanguta kame aka no wiili nji, “Simoni mwana Jowani kana kame oni singa?”

Seli omu tambula nji, “Ee, Mbumu, kame uyii nji kame niku singa.”

Jesu sebeli omwambela nji, “Olise emikoko yange.”

¹⁷ Jesu sebeli omwibanguta kame aka no waatu nji, “Simoni mwana Jowani, kana kame oni singa?”

Pitolosi sebeli weena, kakuli Jesu kame ana ku mwibanguta emyendo yaatu nji, “Kana kame uni singa?” Mi Simoni sebeli wamba kwa yonyene nji, “Mbumu kame uyii einu yonje, kame olimukile nji kame niku singa!”

Jesu sebeli omwambela nji, ‘Olele emikoko yange.’

¹⁸ Niti luli kame ni kwambela nji, “Aba ona kwikala osili wuyu no ubya, kame onoku nunga olukanda wenyene, kame ono kwendelanga omu osingela, kono aba so kulubale, kame so olole amaoko, mi omunjili kame sa kununge olukanda, mi kame sa kutwale oko wasingi.”

¹⁹ Jesu kame ana kwamba ngeso okumonisa Pitulosi elifu safe okukanyisa Nyambe. Munyima no eyi sebeli wamba kwa Pitulosi nji, “Onikoñe!”

Jesu ni Mwiyetwa Woyo Ona Kusingiwa onene kwa Jesu

²⁰ Pitulosi sebeli okutemuna, nikumona omwiyetwa ona ku singiwa kwa Jesu ywakoña, woyo ona ku shendamena ba saali sa Jesu mu nako no mulalelo, mi yokame woyo onakumwibanguta nji, “Mbumu, anyine woyo so kubeteka?”

²¹ Cwale Pitulosi aba ana ku mumona, sebeli oibanguta Jesu nji, “Mbumu, ngasibine sakwikale kwa wuyu mulume?”

²² Jesu sebeli omutambula nji, “Nji kame nisinga nji asiyale okutwala abo sanikaiyele, kwa wene iikene siliko? Onikoñe!”

²³ Cwale elibubo sebeli lihasana mu sicaba nji omwiyetwa wuyu katamba okufa. Kono Jesu kasi kumwambela nji katamba okufa. Kono nji nisinge

nji aikale okutwala aba sa nikeyele, cwale eso siikene kwa wene?

²⁴ Wuyu yokame omwiyetwa woyo opaka etitaba eti, mi yokame ona tiñolo mi kame tuyii nji oupaki waye niwa niti.

Amamaneneno

²⁵ Kono kweeli einu injili no kupula eyo ana kutenda Jesu. Kambe yonje nai kuñoliwa kame nisepa nji elitunga kalitwese okuteula eyo ina ñoliwa.

Luyana Bible Translation
Luyana: Luyana Bible Translation (New Testament)
for Zambia

copyright © 2024 The Word for the World International

Language: (Luyana)

Contributor: The Word for the World Southern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-10

PDF generated using Haiola and XeLaTeX on 10 May 2025 from source files dated 10 May 2025

b071328c-adc7-5e91-a867-254a1a2a7440